

東
華
續
錄

光緒一百九十

臣朱壽朋敬編

臣潘鴻鼎恭校

十一月乙亥朔諭工巡局奏宗室祥山違禁私開小押請交刑部會同宗人府審辦一摺小押當局重利盤剝最爲窮民之累迭經諭令嚴行查禁近來此風稍戢茲據奏稱宗室祥山於奉飭禁止之後仍敢私押物件實屬故違禁令若不嚴加懲辦何以蘇民困而挽澆風祥山及伙犯李文清等均著交刑部會同宗人府嚴行審辦以儆效尤○內子諭開缺喀什噶爾提督余虎恩聲名平常著勒令回籍不准逗遛○商部奏光緒三十年九月十三日接准候補三品京堂張振勳咨呈稱振勳奉 召來京仰蒙 皇太后皇上殷殷垂詢以招徠華商振興商務爲命跪聆之下欽佩莫名嘗聞世之策商務者莫不曰招徠外洋華商振興農工路礦不知不接其言論不祛其疑慮則所謂招徠之術終隔膜也去年振勳蒙 恩召見 皇太后 皇上卽以招徠華商爲訓追憶假旃旋所到各埠當華商集議之時竊有以窺其疑慮之所在或謂中國地大物博外人涎羨自通商以來或招洋股或掛洋旗捷足爭先莫可紀極吾儕一旦歸自海外主客之形幾於倒置縱挈巨資無從著手又或謂商之爲道乘時趨利者也中國官商久成隔閡

設爲奸商所騙土惡所欺加之有司節節留層層鈐束累月經年尙不得直費時曠業所損實多至於外埠僑居已成土著公司之設則股本不可遽提合同之立則期限不能遽滿今若舍舊謀新恐非一朝一夕所可期許他如天時之寒燠土地之燥濕起居飲食之異宜猶其小焉者也振勸爰思外埠華商籍隸閩廣者十人而九其擁厚資營經紀者指不勝屈中國商智未開商力較微而各國莫不藉商戰以爭利於中原商務一端在我已有不能自支之勢居今日而思補救固非招致外埠華商維持商務不可振興商務尤非自閩廣等省入手不可如由商埠擇其聲望素孚之員奏請 特派考察外埠商務大臣督辦閩廣農工路礦事宜予以保護華商之任周歷各埠切實開導勸之以祖宗廬墓之思飲之以衣錦故鄉之樂閩廣之距外埠輪舶往還一水可達室家產業並顧兼營一人而給況商部設立以來綱舉目張以保商爲己任一切下情可由督辦逕達商部凡督辦所到之地商部如在目前地方不致有掣肘之虞官商一氣內外一心如是祛其疑慮有不襁負而至者哉且所謂招致華商者非盡市人而羅致也業必世業財必己財知其以農起家者畀以開墾種植之任以工起家者畀以製造工藝之任以路礦起家者畀以開礦築路之任先由督辦湊集華款認真提倡選擇要地築路一段開礦一區墾種工藝創辦一二事以爲程式二三年後著有成效昭示大信再勸華商出具資財承辦各項公司極力經營由南而北逐

漸擴充開闢利源講求物產窮黎賴有生計四境漸無游民而公家無一錢之費而中國增億兆之實利
權既挽主權自尊戰勝之機固不盡在折衝間矣抑更有請者廣西土匪已成蔓延廣東一帶盜風日熾
一日拒斥其故皆由地多曠土民無教養今日治兩廣者籌餉練勤兵以顧目前之急不得不然而振
勦以爲開墾種植者默化未成之匪也教習工藝者散匪之羽翼也故言商務於闔廣入手不得僅謂
爲善後之策也振勸屢蒙 聖諭既周且摯謹就管見所及縷縷上陳如蒙轉奏請 旨施行商民幸甚
等語臣等伏查農工路礦諸政爲今日刻不容緩之要圖自去年奉 命設立商部 朝廷銳意振興風
氣所開商情漸奮祇以用人不易籌款維艱一時驟難著手茲據該京堂呈稱前因臣等詳加披閱所陳
不爲無見至其謂外埠華商藉隸闔廣者十人而九振興商務須從闔廣入手一節竊維海外僑氓涵濡
聖澤俱有不忘故土之思祇因官商隔閡相習成風遂不免意存觀望誠能派員周歷各埠切實勸導
招徠鼓舞自愜輿情是整頓商務從闔廣入手亦係切要辦法該京堂張振勸素居外洋家道殷實聲望
素孚其惓惓愛國之忱久邀 聖明洞鑒此次條陳各款意在公家不煩籌款而要政可以次第舉行其
志願實堪嘉尚如果畀以事權當能力圖報稱合無仰懇 天恩准將侍郎銜候補三品京堂張振勸
特派爲臣部考察外埠商務大臣兼督辦闔廣農工路礦事宜遇事咨呈臣部核奪辦理先令湊集華款

認真提倡選擇要地築路一段開礦一區興施工藝一併趕速開辦以爲程式三年以後由臣部察核果係事事切實成效卓著卽令接辦由南而北次第擴充如日久無功仍由臣部奏明將差使撤銷免致有名無實至於路礦二事關係利權尤爲重要該京堂允認湊集華款應令一切遵照臣部奏定章程辦理由臣部隨時詳細稽查以昭慎重如此官商一氣內外一心各省督撫地方官均有照料襄助之責并由臣部隨時電咨核辦以收通力合作之效庶幾隔閡胥除而富強可期漸致矣得 旨如所議行○丁丑

上御乾清宮轅國使臣巴樂禮觀見呈遞國書○電 諭駐日使臣楊樞密查留東學生設立同仇會事○己卯諭前據給事中熙麟奏河朔會匪滋蔓地方官捕務廢弛各情當經諭令袁世凱確查具奏茲據查明覆奏河朔會匪滋事首要各犯業已就擒餘黨星散惟地方迭出盜案未能認真緝捕河北鎮總兵卽桂林雖無貪婪實據惟私役弁勇接眷殊屬不合著卽行開缺新鄉縣知縣曾恆祥娶代書之女爲妾不知遠嫌且於書役舞弊詐贓漫無覺查辦理案件亦未允協著卽革職該省營務吏治著陳夔龍悉心經理切實整頓○庚辰練兵處兵部奏 等暨奉 諭旨整飭武備業將釐定陸軍營制餉章暨各項武備學堂辦法並出洋就學章程先後奏蒙 俞允頒行各省在案其餘應辦各事自應次第籌畫以期逐漸整頓竊以爲欲興軍政須有以振起士心欲振士心莫先於注重武職恭讀乾隆五十一年 高宗

純皇帝論曰國家設立武職原欲其折衝捍衛其實並不輕於文臣有明之季文臣用事武備廢弛疆圉孔棘國事遂不可爲此皆重文輕武之流弊不可不引爲殷鑒等因欽此大哉 聖旨昭示萬禩矣臣等伏思武職者固 朝廷所以嚴關寄獎戎功而亦以之鼓舞羣材奔走榮倖蓋必使人人重視乎名器乃能使人人自奮於功名其機甚微其效甚著方今東西洋各國風氣右武人皆以從軍爲樂以武職爲榮雖居下士視若清班以故民氣日強國勢稱盛洪維我 朝武功震鐸今古 開國之初內而八旗勁旅外而各省綠營分職設官規模大備軍興以來各路營伍平賊立功其以戰績遞保至專閫大員者指不勝屈而國莽不學之夫亦得以遭際時會廁身各職自致通顯事定之後無缺可補或投置閒散於千把末秩則更視爲無足輕重之官稍有志節者咸鄙薄而不屑就武職猥濫莫甚於斯亦積漸之勢然也近者 朝廷銳意自強屢奉 詔書振興武學海內人士靡然從風其自將弁武備各學堂畢業及游學回國諸生肩背相望於道並有以宿將而折節受學亦有以文職而隨班肄業者莫不精研藝術具有專長而新定營制選派營員又多屬出身學堂或諳練武備之人誠以兵事至精新理日出必須嫻習科學方能蔚成將材固非如從前國莽之夫徒恃血氣以從事也夫以學堂成就之難軍營選擇之慎而其進身之途仍不外乎千把末秩無足重輕之官其誰不廢然而自沮乎董仲舒有曰琴瑟不調甚者必改絃而

更張之臣等嘗考歷代職官其制度之沿革異同名號之繁複叢雜多至不可勝紀推原其故大抵習見者不足爲榮則後起者必別立名稱以更易之乃能使耳目爲之一新志氣爲之一振因時制宜之道蓋亦有出於自然者近歲以來 朝廷破格用人屢有以漢臣而 特加滿秩者異數殊寵誇耀一時馭世微權莫妙於此且今日四海一家率土臣民同居 覆幬之中久泯滿漢之見若因勢利導而予以人情之所榮知必有鼓舞欣欣翕然嚮慕者臣等公同商酌參仿八旗官員之秩序旁採各國軍營之規制擬定新軍官職品爲三等析爲九級上等軍官有三第一級曰正都統秩視提督階從一品第二級曰副都統秩視總兵階正二品第三級曰協都統秩視副將階從二品中等軍官有三第一級曰正參領秩視參將階正三品第二級曰副參領秩視游擊階從三品第三級曰協參領秩視都司階正四品下等軍官有三第一級曰正軍校秩視守備階正五品第二級曰副軍校秩視千總階正六品第三級曰協軍校秩視把總階正七品嗣後凡學堂出身或游學畢業以及諳習武備帶領新軍各員均以此三等九級軍官分別除授各與品文職體制相仿如蒙 俞允其一切補授遷轉詳細章程再由臣等處 臣部悉心覈定奏請 聖裁至各省綠營一時尙未能盡廢其官名自可暫仍其舊俟將來綠營盡裁時再行酌量更改庶足以作新士氣振勵戎行名器自不可輕上以隆 聖世官人之典榮途俾知共奮下以儲干城衛國之

材實於經武圖強裨益匪細得 旨如所議行○政務處吏部奏光緒三十年九月二十九日軍機處交出雲南巡撫林紹年奏雲南巡撫一缺應可裁併一摺奉 硃批政務處會同吏部議奏欽此查原奏內稱各省幅員廣闊政務殷繁無過直隸四川兩省皆以總督兼管巡撫指理裕如雲南必無獨須督撫並設之理且多一衙門即多一經費裁此一缺已可抵各項差缺數十俸精養廉文案巡捕標營官弁兵丁等項數更不少究其所辦之事又無非總督所必當兼者徒使通省大小各衙門多一分案牘之繁於事究無裨益是裁此一缺就屬員論則稟承專一就巡撫論無庸多此駢枝就總督論更不至有所牽掣前年臣兼署督篆數月署督臣丁振鐸前在巡撫任內兼署總督年餘前督臣崧蕃兼管兩篆更將三年毫無貽誤可見兩缺原無須兩員若併而為一以總督兼管巡撫責成愈專事權歸一必於一切公事尤為裨益等語臣等查督撫同城之弊歷來臣工言之至詳即如原奏內所引前廣東巡撫郭嵩焘前奏督撫同城有損無益情形尤為剴切近年福建巡撫久經歸併閩浙總督管理湖北廣東督撫屢經兼署亦均無貽誤是其明證臣等悉心酌度督撫同城往往或因意見參差公事轉多牽掣現在時艱日亟督撫尤宜專其責成自不如即為裁併以一事權而免推諉所有雲南巡撫一缺應如該撫所請即行裁撤所管事務照直隸四川甘肅福建辦法歸併雲貴總督兼管標營官弁以下如何裁併應由雲貴督臣丁振

鐸奏明辦理其湖北廣東巡撫與雲南巡撫事同一律亦應酌擬歸併湖北巡撫係督臣張之洞兼署擬請卽予裁併惟廣東巡撫一缺廣西軍務未竣廣東盜風亦熾署督臣岑春煊現駐西省尙賴廣東巡撫鎮攝地方應俟署督臣回東後察看情形再行請旨上諭政務處吏部會奏林紹年奏督撫同城事權不一請裁巡撫一摺雲南湖北巡撫兩缺著卽行裁撤湖廣總督雲貴總督均著兼管巡撫事○陸元鼎奏學校所以育才教育所以興國古今中外皆一理也近年迭奉諭旨辦理學堂仰見朝廷作育人材振興國勢之至計臣雖愚陋其敢不仰承聖旨實力奉行湖南省自前撫臣趙爾巽振興學堂一年之中創立最夥漸推漸廣風行各屬臣抵任以來謹就省城各堂親歷周覽未嘗不歎其提倡之力規畫之宏祇以風氣初開其中功過利弊非旦夕所能驟見而杜漸防微不得不慎之於始當經參照學堂大臣奏定章程編成文告諄切誥誡並刊印前項章程二千餘部頒發各屬以示遵守兼飭學務處於學界中應盡義務切實籌辦在案臣查湘省學堂大致區分三路長沙岳州寶慶爲中路常德澧州辰州沅州永順靖州爲西路衡州永州郴州桂陽爲南路人情之通固不同興辦之遲早又異故現在各屬風氣未能一律從同中路惟長沙府中學堂甫經籌款辦成其餘官立民立學堂不下二十餘處大有蒸蒸日上之勢然求其缺陷殊非一端大率形式具而精神少空談盛而實學衰或以敷衍爲具文或以激烈爲

宗旨隨時隨地留心查看勉籌補偏救敝之計除飭學務處嚴加稽查外一面就省城師範高等學堂改良辦法樹之風聲擬於師範教科之中責令教習生徒輯譯詳細講義庶科學漸有津梁於高等則注重語言文字算學理化諸門以備將來派入大學堂研究專科及出洋學習專門之選此籌辦中路大略情形也西路則常德一府爲全省商務薈萃之區華洋雜處風氣驟變士紳之辦學務者銳意猛進振奮無前然以教習未盡得人頗多物議辰州則約束嚴明進步較爲穩固惟學術最愚歧趨故常德已成之局盤剝改革之爲難反不如永靖僻陋之鄉督率倡興之猶易現正選舉老練之紳監督而稽查之庶幾化澁移俾得趨於正軌此籌辦西路大略情形也南路講求教育爲時較晚設師範之設尙乏專科前撫臣趙爾巽撥款創辦設堂衡州事纔經始臣抵任後督飭催辦近以全工落成監督教員陸續聘到總期始基克正乃可圖擴充久大之規衡府中學亦開辦在即規制稍求完善以爲南路先導其餘各屬雖皆設有中小各堂名目而物力師資兩皆未足恐非一時所能奏功惟郴州集款稍多擬令切實經營俾勿虛糜款項此籌辦南路大略情形也至出洋游學一端在今日誠爲急務然考之從前所派大都普通尙未卒業語言又未研求遂虛糜節而施轉多流弊現據學務處議詳除業經資遣者仍寬其學期俾得卒業外其續行選派者於考核之始語文科學必立一格以爲衡既派之後講義教科必按期呈驗否則任

缺毋濫以節浮糜或就各就範圍不至務虛名而貽嘆患此又臣整頓游學之辦法也臣維風氣無百年而不變錮蔽之久自應力求開通然一以開通爲事而不顧其本原之所在勢必宗旨歧出邪說橫行大爲風俗人心之害是以防弊莫如立法而行法首在得人學堂中監督而外首重教習教習之邪正賢否學生之趨嚮行習視爲轉移一有不慎爲害甚鉅臣惟有督飭學務處實事求是加意延訪務得端人正士碩學通才別類分門各專一席期於挽頹風而收實效以仰副 朝廷興學培材之至意下學務大臣知之○辛巳霽○賞道爾昆尙書銜留京當差調端方爲湖南巡撫以陸元鼎署江蘇巡撫○調升允爲江西巡撫以夏晉爲陝西巡撫○調錫良爲四川總督調魏光燾爲閩浙總督以丁振鐸爲雲貴總督○以林紹年署貴州巡撫○命雲慶開缺以曹志忠爲湖南提督○命李占椿開缺以楊金龍爲江南提督○壬午予故署兩江總督李興銳政績交國史館立傳○以樊增祥爲陝西布政使胡景桂爲陝西按察使○諭軍機大臣等鐵良奏擬請派員抽收土膏統捐以裕度支一摺據稱湖南湖北合力於宜昌設立總局抽收土膏統捐繼又併江西安徽兩省合辦較各省分辦之時溢收甚鉅已著成效兩廣蘇閩亦係雲貴川土行銷之地若合八省爲一收數必更可觀收捐章程悉照宜昌現行辦法凡納總捐後運售各省者如非落地銷售概不重徵此項收款均照二十九年收數作爲各省定額由宜局合收分解溢收

之數另款存儲候撥等語土藥稅捐統歸一處抽收既爲商民省累又於進款加增著財政處戶部即行切實舉辦其統捐收數除按各省定額仍舊撥給應用外其餘溢收之數均著另儲候解專作練兵經費的款不得挪移至此項統捐應如何遴派委員通籌辦法期於推行盡利之處並著財政處戶部會商各該省督撫從速詳定章程奏明辦理原摺著鈔給閱看將此通諭知之○癸未予故浙江處州府教授內閣中書銜黃以周列入國史儒林傳○諭前據御史李灼華奏參江蘇官吏營弁劣款當經諭令端方確查具奏茲據查明覆奏所參吳家正等員查無其事即著毋庸置議前署南匯縣知縣張寶琨緝捕不力惟案係接緝又於參限內離任候補知府胡玉瀛辦理釐捐雖於積弊不能剷除尙無他項劣跡業已撤差均著從寬免議廣東雷瓊道前江蘇蘇州府知府向萬銘平日居官雖有能聲惟於張韓農賭博潛逃一案因責償公款追捕逃人辦理多未允協且更換案卷起滅自由著交部議處前署泰賢縣知縣傅鑫擅離職守因案科前任內逃犯並未稟報追捕候補知縣李筠承辦海塘工程違章擅拔木椿經手商股又多含混並干預向萬銘所辦賭案貽人口實前署長洲縣主簿周紹棠承指詐銀均著卽行革職候補知縣范守佑雖無他項劣跡於賄案亦有干預著以縣丞降補以肅官方該省吏治營務著該督撫隨時認真整頓毋稍徇縱○端方奏近來時局危迫首宜精練陸軍而江南當江海要衝海軍之學尤當注意

江南雖設有水師學堂而於風濤沙線行船駕駛之法均未親身閱歷非選派出洋游學不能切實研求近年出洋學生習陸軍者頗不乏人習水師者則絕無而僅有現與英領事商允該國水師提督電稱中國水師學生准卽挑選由駐滬英國水師總兵分派各船學習等語業於江甯水師學堂中挑選合格學生六名前往學習暫以兩年爲限所有學費卽於通州紗廠官本利息項下分年籌給較之派赴出洋游歷收效不少該學生等一經分派各船卽不啻身親所事且又近在上海一切易於約束尙可望有成就以濟時艱下所司知之○端方等奏據江西省紳士前署山東鹽運使候補道梅啟熙等呈稱近年各省鐵路利權列強皆思覬覦自宜早爲籌謀預爲地步現擬將江西省鐵路統歸本省紳商通力合作自行承辦惟事體重大必須巨紳主持擬卽公舉在籍紳士前江甯布政使李有棻爲全省鐵路督辦懇請會奏等因又據前江甯布政使李有棻暨該紳等呈稱開辦江西鐵路先以南昌九江爲權輿以次擴充需費甚鉅除設法招股外必先籌常年專款方可及早開辦以冀速成茲查有食鹽一項爲全省人民日用所必需若援案加價每斤定以四文則每年可得二十餘萬所取無幾不致病民通省照辦亦無偏私之弊且現在各州縣興辦小學堂需款甚急若以所銷引數以加價多少作爲各州縣公股每年所獲股息卽由各州縣承領以充學堂經費及地方善舉之用是取於民者仍還之於民尤爲一舉兩得公請會奏

立案並將開辦章程議定呈請核辦前來臣等查今日各省路權關係兵政財政命脈果有地方紳士公同認辦則權力不爲外人所侵利益卽爲中國所獲亟應維持保護以觀其成該紳等公舉李有榮爲督辦前准商部咨稱業經江西全省京官在京遞具公呈由部奏請奉旨允准在案此次所定章程亦尙屬妥惟是事體重大必須先有常年專款方能陸續舉辦該紳等雖經手自任股本而工費繁鉅事當圖始未必能十分踴躍又非有大宗的款不能立基礎所請援案加價自係萬不得已之舉臣等查江西引鹽前因籌墊賠款業經先後加價十文深恐私充官滯有礙商政疊經電商兩淮鹽運司及江西督銷局體察情形互相斟酌茲據該司局覆稱雖同有滯銷之慮而以全省路權所在不得不勉從其請惟請於緝私一層力加整頓俾圖挽回臣等再四籌思竊以鹽爲小民日食所需不以價之貴賤而增減卽岸引亦不因此而暢滯銷紳以本省願出之錢辦本省應辦之事似不能多存顧慮致違衆心況各省加價不止一次亦不聞稍有阻礙卽或偶形滯銷將來鐵路告成貨物流轉其利益亦必十倍於此仍可徐圖抵補應請准於江西引鹽每斤加價四文另款提存悉數撥充鐵路經費俾得無誤要工早圖實效以仰副朝廷振興商務收回利權之至意至該紳等聲請所銷引數留作各州縣公股是否可行業經飭由藩司核議詳覆另行酌辦得旨如所請行○甲申諭火器營奏整復兵制加練新操一摺外三營兵丁向

稱精銳近年以來漸形廢弛著卽照該王大臣等所請認真挑選精壯督飭操練其營總管帶等官尤須慎選明習兵事之員以期得力其圓明園八旗健銳營兵丁均著該王大臣一律依照辦理俾成勁旅而重戎行○端方等奏查接管卷內准商部咨稱奏請將江海關道收欸變通生息一摺奉 旨著兩江總督江蘇巡撫督飭江海關道照數撥解商部欽此鈔錄原奏行令遵辦等因當經前督臣劉光燾轉行去後嗣據江海關道袁樹勛稟稱江海關所收常洋兩稅及鹽釐船鈔等項月有行撥之欸時收時放存數無定其各省所解新增賠欸及各項洋債雖間有先期解存而逾期始行解到及延欠未解請部飭催者亦復不少原奏謂關稅項下有常年存欸二百萬賠欸項下逐月存欸六百萬蓋係約略估算不能執爲定數且賠欸洋債皆關要需一經到期卽須提付若盡行存放設或提繳不能應時貽誤匪細必須酌留數成實存在庫以備緩急現經傳集錢業各商公同籌議僉謂上海銀息向有早晚兩市皆在錢行公定其日息大都以每百兩三四釐爲多縱有時貨物銷暢現銀短絀利息因之驟漲然亦係偶然之事近來輪電交馳消息便捷銀利稍昂則金立至此外常存之欸則視存期久暫爲衡關稅洋欸爲數既鉅又皆暫而不常部定行息各數較之市面銀拆懸殊領欸愈鉅賠息愈多勢難遵辦經該關道再三勸諭允凡發放之欸視其生意之大小聽其酌量領存不爲強抑一切收支存放由道編立印簿逐日登記另派

熟諳商情之員並酌用司事常川駐署專心經理其與各莊號往來概照商市通例全憑經摺以爲根據
每屆三箇月將關稅賠款還款按照部奏各分收數應數開具細冊造報一次各錢商初猶疑慮繼見所
定辦法與平時商家往來無異始允將三月分以前關庫所存庫平銀二百七十萬兩分作三月初一十
五四月初一三期具領以後各省解到洋款隨時發放的照英商匯豐日本正金兩銀行存放辦法以日
期之久暫定利息之多寡而略有加增凡發存一年收繳者大盤行息六箇月者五盤行息存三箇月以
至兩箇月一箇月者皆四盤行息均按長年計算收款之時於四日前預先知照即於知照之日停息其
發存不及一月者即照銀市拆息辦法隨市情逐日核計又該關設有源通豐裕銀號係專管經收進出
口稅項並無別項生理所收稅款隨收隨撥存數無多向於月底結算以收抵放有餘再行提存內庫今
既變通生息擬令仍照向章每屆月底算明結存若干即以下月朔爲起息之期亦按存期久暫分別計
息與各錢莊一律辦理惟至少以三箇月爲期其發存長年之款到期時或轉或還須先兩箇月知照以
示體恤分擬章程呈送核辦所有該關道衙門造冊應辦工紙張等項經費即照商部原奏准其由息
款內提出百分之五爲津貼俾資辦公仍嚴飭經手司事人等不得私向商家需索絲毫使費以杜流弊
並據該關道另稟自三月初一日開辦起遵照部覆以三成存庫其餘七成均已發莊儘數具領生息截

至五月初一日止各莊號實共領存關稅洋款庫平銀四百三十萬餘兩各等情稟經咨准商部核覆照辦在案下商部知之○丁亥諭本年恭逢 慈禧端佑康頤昭豫莊誠壽恭欽獻崇熙皇太后七旬萬壽隨班祝 嘏之革休等項人員經軍機處開單呈覽所有單開各員除另有餘罪業經開釋及軍裏新疆釋回人員毋庸加恩外五品以上者均著照原官降二等賞給職銜六品以下者均著賞還原銜其已有職銜者均著賞加一級隨同叩祝之耆民等應如何賞賚之處著該衙門查照成案辦理○呂海寰等奏臣海寰臣宣懷於本年二月承准外務部咨開據葡萄牙國駐京使臣白朗敷照稱奉本國諭改修稅則一事派該使臣前赴上海查押並將光緒二十八年九月所訂之新定增改條款暨是年十二月所訂之會訂分關章程條款內之意同語異之處改爲一律其修改稅則及新定增改條款並會訂分關章程條款合訂一本以歸畫一該使臣擬於二月上旬赴滬請轉行知照等因當於該使臣抵滬後訂期與之會晤面詢照會內所稱各節將何者爲意同語異及如何改歸一律之處詳爲解明以便會商辦理該使臣始聲明原因光緒二十八年新定增改條款及會訂分關章程條款該國議院未經核准不克互換是以此次修改商約另行擬送條款即將前次條款章程意同語異之處包括在內臣海寰等以該使臣晤對之詞與照會外務部文意不符即經駁拒不議並備照會詢問該使臣令其明晰照覆旋據覆稱前奉本

國訓諭業在外務部面行聲明一本國政府准議院所議給權於駐華公使新立商約卽照近日各國與中國所立之商約無異二現欲請立新約包括光緒二十八年九月所立之條款暨是年十二月會訂之事條但內有更改者俾中葡兩國主權免有視為關礙之處三至於葡國協助中國防緝走私洋藥一事奉本國政府訓諭可將此項緝私之法整頓以便全免走私四因欲立之新約應包括光緒二十八年九月所立之條款並十二月所訂專條內之宗旨或係更改或係推廣悉行包括在內所以本國之意毋庸將前約核准各等情前來又經電詢外務部覆云該使臣並未向部聲明前約作廢當日議約原以分關鐵路爲彼此互換利益儻不將光緒二十八年之約核准藉包括爲詞以廢分關之議則中國亦必將鐵路互換之照會聲明作廢臣海寰等卽照部電直告該使臣堅持許久屏不與議該使臣迭來商懇以澳門設立分關實有礙於該國主權故議院未能核准欲明言前約作廢又有礙於該國體面故以包括宗旨毋庸核准爲詞臣海寰等復細繹前定分關之約第三第四兩款載明係爲稽查澳門出入口運入中國各埠洋藥稅餉起見原以澳門協助中國徵收洋藥稅釐早經立有專約其權仍在澳官中國海關稅務司並不能過問用是議在澳門設立分關今因格於議院寢而未成該使臣照覆既經聲明奉該國政府訓諭可將此項緝私之法整頓以便全免走私果能將緝私辦法切實妥擬得收成效未始不可稍予

通融辦理電商外務部及臣世凱臣之洞意見相同該使臣復電駐京參贊赴外務部再三陳說並託英使爲之轉圖外務部始允電致臣等彼此和平商訂因與該使臣首先議定須將稅則及現議商約並編私一切詳細章程暨鐵路合同一律妥訂後奏奉 允准卽同日畫押以爲互相鈐制之計此商約未經開議已再三辯駁之情形也嗣據該使臣陸續開送商約款文二十條一面鈔寄外務部及臣世凱臣之洞察核一面由臣海寰及臣宣懷摘其萬不能允者兩條一爲中國所有土產食物由各埠轉運澳門專備該處居民所需者一概免納各項出口之稅一爲中國土產貨物於出口時如將正稅完清若運入澳門將來轉運中國地方於復進口時應完稅項與通商此口轉運彼口者一律辦理先行駁刪該使臣初未肯肯並以澳門食物免稅一條爲前訂分關章程內所有與我力爭駁以前約既未作准卽可由我增減且此兩條均於稅務大有關礙深慮奸商藉此影射偷漏他埠從而效尤再四辯論強而後可又寓澳華民請每年准運米六十萬石免納稅課以資食用如將來此數實不足充寓澳華民之所需則可將數加增一條嚴駁力拒該使臣以民食所關爲彼政府注意之事望請不已相持數月極意磋磨彼始允不入約文援照日本成案改用照會存查電商臣世凱臣之洞往復籌酌並電兩廣總督查覆旅澳華民不過八萬約需米二十四萬石核與臣之洞前在粵督任內札行司局各案酌定米石出洋多寡不甚相遠

又與該使臣駁減米數占數皆係該使臣始減至四十萬石電經外務部酌定每年准運三十萬石臣世凱之洞亦以此數不能再有加增臣海寰等復與督說百端堅執到底該使臣見我不肯鬆動然後就範並照臣世凱電囑於照會內多立限制指定在廣東省購運價值該省荒歉始准赴他省不禁米出口之口岸購運每年由兩廣總督發給米照三十萬石年終將用剩米照於次年正月繳銷換給新照以免補運此外各款與英美日各約相同者九條於意義稍有出入增損之處詳加酌核悉令改歸一律首尾例款四條為議約所應行聲敘亦與酌改妥洽其餘為該國所特請者五條又奉外務部電令添入限制華民買入洋籍一條該使臣以此事可將情形敘入照會由該國酌辦不願入約經臣海寰等詳與辯論甫允照辦並將英美日約所有之整頓國幣一條為該約所無議令增入綜計釐訂條約二十款第一款聲明葡約照舊遵守第二款聲明和議所定加增稅則葡國允遵照辦第三款聲明入澳門洋藥均因於官棧每年澳門食用洋藥定數以外不得再有搬出凡報運中國各處亦應設法以防私行運往所有應定各項章程應由彼此兩國商訂又葡國必定律例如有犯此約章應分別懲處第四款澳門水陸地方應如何防緝走私彼此派員會同訂明查緝之地方並可行之辦法第五款照英約推廣西江各口及廣州府屬各埠行輪惟須遵守現行一切章程如不遵守仍不准照辦葡國並定律例分別懲辦第六款葡

葡牙酒無該國執照不得照本約所附稅則納稅第七款通商口岸地方居住貿易第八款華人入葡國
版籍須專定律例杜其在內地所享利益及藉葡籍以脫卸在華所立有合同責任第九款加稅免釐第
十款發還海關存票第十一款釐定國幣第十二款禁止莫啡鴉第十三款振興礦務第十四款合股經
營第十五款保護貨牌及創藝執照第十六款整頓律例第十七款籌安民教第十八款條約年限第十
九款本約以英文爲準第二十款在北京互換以上各款爲我所側重者在洋藥緝私一事該使臣立意
約文以渾括爲準免致議院再有疑阻商酌至再將詳細辦法另立專章計釐定第三款專章五條大旨
在洋藥運至澳門必須國入官棧其由棧報運中國則由彼此會同稽查必期完清海關稅釐始准搬出
如不進官棧私自登岸按葡律核辦其由原船私運中國由拱北關緝辦並嗣後有應行商酌加添由澳
官與稅務司商訂第五款專章十五條在澳門專設躉船以便由拱北關查驗由澳門來往各處貨物爲
要義其一切限制辦法悉照英約內港行輪章程核議迭經世凱臣之洞往復籌度公同斟酌妥籌電
請外務部核准然後與之定議至陸路稽徵稅項訂設在總車棧載入鐵路合同之內又第三款澳門
食用洋藥定數恐將來澳督與稅司多少爭執意見不同特用照會聲明可由彼此在北京之代表人細
查會定又籌安民教一款該使臣奉其政府訓條另備照會聲明凡有天主教堂在華之他國已經允許

者葡國始可照辦此會訂約款章程及另備照會之情形也伏念葡萄牙國以和約未經與議不認各國修改稅則而要索澳門分設鐵路與粵漢鐵路相接是以外務部原議在澳門設關以爲互換利益今該國以議院未能核准前約已不廢而廢故此大詳訂中國海關在澳門水陸地方查緝洋藥走私辦法極限以爲補救該使臣欲以新約包括前約誠心相助妥訂條款章程雖無設關之名可收緝私之實並由臣宣懷與該使臣將粵澳鐵路合同督同兩國商董妥議已將車站徵稅一條列入合同之內電請外務部核准正擬電奏請 旨又准外務部電開接廣東督撫電據廣東紳商公稟以粵本係缺米之區籲請勿允葡運粵米情詞迫切不能不俯順輿情令再磋商葡使等語適該使臣已奉其本國政府訓諭令速返國不能再候米事既須更議恐不能即時商訂遂擬將商約暨章程先行畫押卽經會電具奏於本年十月初一日奉 旨著呂海寰等就近畫押欽此該使臣以原請購運食米本未指定粵省既民情不順可由他省購運備一概不允則商約章程皆行作廢詞氣決絕憤形於色堅請給與憑函卽經電奉外務部示覆憑函措詞亦要斟酌又切囑勿誤商約畫押復與葡使切商告以中國產米省分無多粵省如此他省民情何如尙不可知必須由外務部電商方能酌議該使臣謂彼此已意見相同請將我之照會酌改聲明俟外務部與產米省分各督撫詳細商酌辦法容後與駐滬葡領事議定以爲准其運米之據臣

海軍宣懷以番押期迫非空言所能就範該使臣既允緩定辦法姑如所請給予照會將來尙可從長
與議業經電達外務部存案上海宣懷與宣懷遵即繕備漢文英文葡文約本章程各二分派隨辦商約
內閣學士劉宇泰候補四品京堂李經方道員楊文駿梁瀚勳洋員質權理戴樂爾與該使臣所派譯員
互校復將洋文寄請外務部覆核無異與該使臣訂期十月初五日將商約章程並稅則暨宣懷與該
使臣另議粵澳鐵路合同在上海同日分別畫押鈐印彼此各執一分除稅則附片陳明鐵路合同由宣
宣懷另案具奏外所有澳約完竣遵行畫押緣由理合合同恭摺具報並將約本章程漢英葡文各一
分照案齎送軍機處進呈御覽下所司知之○戊子以俄國波羅的海艦隊東來飭沿海各省戒嚴○
已丑諭軍機大臣等有人奏甘肅靖遠縣知縣劉文海橫征暴斂委員余重基分贓膠應通判陳元驥劣
幕余壽生等串同舞弊各摺片著岑毓英按照所參各節確查具奏原摺片著鈔給閱看將此諭令知之○
庚寅冬至大祀天於闕丘上親詣行禮○壬辰諭軍機大臣等李經羲電奏悉據楊廣西匪股旋
撲旋熾實因鉛碼之多惟有誘戰設計嚴斷接濟不熾自戢核計戰功應以多獲快鎗快碼爲上分營分
哨實報實核并知登時發獎兵知立給優賞鉛碼全數繳驗不准留營存鎗先編號烙印報查如有購鎗
冒獎及虛報失鎗旋冒購得鎗與奪獲匪鎗置不盡繳者嚴查正法等語匪根既絕匪患自消著岑春煊

李經羲卽照所陳各節督飭認真辦理惟民間練快鎗留以防匪應如何分別查存以免兵勇差役藉端訛詐騷擾仍著該督撫等妥籌辦法將此諭令知之○甲午春燈等奏竊三防股匪於八月十四日竄踞羅城縣城飭署右江道龍濟光督營收復並於小長安一帶兩次追剿獲勝先經臣等摘要電奏聲明在事出力人員另摺請獎在案當八月初三日匪陷三防分股下竄前敵各軍被匪阻隔轉在賊後春燈適在慶遠屬之潯字營馳往援剿詎兵未發而悍匪歐四白毛七等率黨二千餘圍攻羅城縣城署知縣李澤先率練兵出外防剿衆寡不敵死傷過半十四早匪由城東南隅攻入城遂失陷時龍濟光所帶各軍尙未調集卽先率兩哨及餘卒二百人星夜馳赴羅城自十五夜戰至十七辰刻始奪回城外潯羅兩村及硯山獅子山而匪由黃金龍岸一帶來會者不下七八千人龍濟光督隊晝夜苦戰二十三口調濟營及慶防副中營陸續趕到二十五晚龍濟光重懸賞銀激勵將士派潯字選鋒營扼城外鳳凰山分隊進攻西門又派前營山城東南隅進攻派潯字右營副中營慶防副中營及奏革知縣李澤督率練兵由南門進四路衝突忍死血戰斃匪約三百餘人至二十六日黎明各營進抵城下龍濟光率附生楊漢蒙錫麻奮力進攻一鼓登城遂將羅城縣城收復匪出東門奔竄小長安龍濟光卽飭李澤先入城安撫百姓一面分兵尾追一面自率健卒繞出小長安之前遏匪去路臣等聞報飛飭右江營務處道員

王芝祥督率成字營銘字營熙字營柳防營前進要截九月初三日各營會合濟軍在羅城融縣柳城交界之王村一帶與匪猛撲斃匪三百餘名次日又分路進攻分統成字營守備劉成貴追匪至融羅交界之牛鼻河溺死鎗斃者共百餘人濟字營攻破小長安匪巢殲匪僞之匪勢大敗伏查龍濟光自去冬帶濟字四營由滇赴百色泗城一帶剿辦游土各匪半年以來地方漸臻靜謐本年五月委署右江道篆並令添募四營先辦慶遠各屬行經河池思恩等州縣遇匪卽擊均有斬擒節經隨時奏報市抵慶郡遂援羅城每戰必自督陣不避艱險所部營員亦多驍勇此次苦戰旬日稟報陣亡什勇約百餘名亦足徵匪徒之狡猾攻剿之不易道員王芝祥督催各軍要截赴機亦極迅速守備劉成貴兩次攻匪衝鋒剴疾殺賊百餘名極爲奮勇當此匪勢未靖兵力多疲若不將異常出力各員立請優獎無以鼓勵戎行合無仰懇 天恩俯准將委署右江道統領濟字營花翎鹽運使銜貴州補用知府龍濟光免補本班以道員留於廣西補用並 賞加二品頂戴附生蒙錫麻楊漢均以巡檢分省前充補用分統成字營補用守備劉成貴管帶濟字前營補用守備龍得勝均免補本班以都司儘先補用並加游擊銜管帶濟字選鋒營千總白肖祿幫帶千總白志誠均免補千總以守備儘先補用並加都司銜幫帶濟字右營把總納順洪管帶濟字副中營把總李文富均免補把總千總以守備儘先補用以上請保文武僅止九員確無冒濫得

旨如所請行○岑春煊奏梅寨股匪於八月初三日竄據三防十四日又竄據羅城縣城均經臣先後電奏八月二十日欽奉十九日 旨署羅城縣知縣李澤藩革職從嚴查辦王瑚符開銘馬漢藩查明失利情形一併嚴參等因欽此伏查三防爲羅城縣屬地居繁盛路當要隘先經飭派武匡軍統領王瑚率帶勇隊礮雷扼紮防守匪自梅寨竄出在三防以上之東水林峒一帶盤踞肆擾王瑚率隊先駐羊峒探聞匪欲由明峒口渡河遂留袁汝葵周茂林扼守羊峒自率先鋒隊管帶管長清分扼明峒口新鋪以堵匪竄龍岸之路七月二十六日李連元孔繁琴復率兩中隊馳抵羊峒與袁汝葵周茂林會合二十七日匪勢洶湧李連元卽與接仗連戰兩晝夜官兵無所得食饑餓欲死周茂林中鎗陣亡王瑚撥隊前往助戰匪踞就近之大山間夜聞賊中有號哭之聲八月初一日全股三四十人山新鋪而上拚命繞竄王瑚督隊隔河擊之管長清分官兵在明峒迎擊李連元等在下攻擊其旁匪等竟舍路翻荒山而出峒口王瑚恐三防有失急調金寶善一隊至新鋪於初二日半夜拔隊疾行初三日抵小拱峒自帶數十人與匪夾河相持一面令金寶善率隊赴三防駐守初四日午刻甫抵三防東面之高山而三防已爲匪據駐守該處之礮隊管帶沙瑞忠陣亡三防主簿古桐保亦及於難先是此股悍匪由梅寨竄出峒頭盤旋於林峒東水各村寨之間臣卽料其必於融羅兩屬求一出路因恐武匡軍力單弱當調符開銘率銘軍兩營

取道融縣馬漢率熙軍一營取道羅城分兩路馳赴援剿銘軍市到東水匪已由東水下竄三防跟追尾擊熙軍繼至先後與武匡軍會合於三防對面之磨盤山各據左右高嶺匪晝夜來撲均被擊退各軍露宿山頂又皆無糧求米僅得十餘擔連日士卒不得一飽有掘草根以爲食者該統領營官等猶互相激勸籌議追攻不料初九日早晨賊匪遽行襲至繞出熙營之前奪得左面極高山頂自上擊下我軍不支匪乃乘勢下竄致有羅城之失此三防被匪竄踞之前後情形也伏查武匡軍派駐三防一路未能據險以守銘熙兩軍赴援亦未能共圖抵禦力竭匪鋒致令窮寇復能乘機挫折各該將領身當前敵實屬無可辭咎惟苗山道路異常險阻時值瘴癘方熾病勇已十之六七兼以糧運不繼各該軍與匪苦鏖數晝夜之久既疲且饑致有此失飭據署右江道龍濟光查覆並派員詳加密訪證以各軍歷次稟報情形均屬相符尙無諱飾王瑚符開銘均因憂憤致疾馬漢亦身被重傷其失利實因地勢險阻士卒饑疲似與玩寇貽誤者有別當此匪勢方張之際玩誤退縮者固當嚴辦竭誠心力者似可原情始足以收衆志相應請 旨將武匡軍統領調粵差委四川補用直隸州知州王瑚督帶銘字營守備符開銘督帶熙字右營守備馬漢從寬一併摘去頂戴留營帶罪立功以觀後效武匡軍第二營隊長周茂林督帶礮隊外委沙瑞忠不避鋒鏑臨陣捐軀署理三防主簿古桐保被執不屈大節懷然並爲匪破腹其死事尤極慘酷

以上三員合無仰懇 天恩俯准飭部照例議敘以慰忠魂得 旨如所請行○乙未予故贈太常寺卿
曾國華於安徽省城及湖南湘鄉縣原籍建祠○丙申諭曹鴻勳奏武職大員短絀餉餉藉端克扣請旨
懲處一摺貴州護古州鎮補用總兵劉仕旺前因游匪竄擾防軍失利業經吏部議處予以降調處分茲
據該督撫查明該員前帶安義右營缺額甚多領發餉銀復有藉端克扣情事似此貪劣營私實堪痛恨
劉仕旺著先行革職該革員現已回籍卽著湖南巡撫派員押解赴黔歸案審訊追侵款從嚴懲辦以
昭炯戒○庚子丁振鐸奏廣南派出督帶陸朝珍王國寶等四營在粵境百色鎮邊西林等處剿捕游士
各匪屢有斬獲經三省邊防營務處道員謝汝欽及該各營先後稟報旋以泗色一帶粵軍不敷防布兩
廣督臣岑春煊及謝汝欽電請由滇添派遂又派出富新前等兩營合計六營仍駐粵境會剿前於五月
內曾經附奏陳明在案五月以後因柳慶撫勇叛變泗色一帶亦異常震動據謝汝欽電稱賊勢浩大衆
輒數千而駐紮平樂村之綏遠營左哨本係撫隊亦有叛變鎗斃該營幫帶之事陸朝珍王國寶電稟經
謝汝欽派令飛往龍州坡一帶密截然天峨等處與黔交界八蜡過馬樂西均在泗色以下距滇邊二十
餘程綏遠四營多係撫游前在泗城且猶索取舊欠打單銀兩各情陸朝珍王國寶等輕軍探入深爲可
慮當電飭開廣道魏景桐署廣南府知府王正雅嚴防密探並謝汝欽往返妥商務宜穩紮穩打審勢量

力總期演變益顧全大局爲妥旋據謝汝欽電稟賊軍叛後泗城幸尙無事所有竄匪經陸朝珍李朝興各帶所部並黨新團哨追擊多所斬擒當卽解散九月初六陸朝珍王國賓奉派前營右哨同續後派出之富新前營胡興所帶團哨赴上林堵截陸朝珍自率所部及胡軍兩哨赴平樂村進剿初九日王國賓由泗城遵派唐登甲率左右營弁兵三哨自坡心盤陽探擊匪由新堤後路九兒寨竄恩隆關之朔乙鳳山李朝興及綏軍管帶黃家廉跟蹤追至卜勞三面來攻各有斬獲並奪回拉去之男婦幼女共四名口匪竄賜廟該管帶等追至作塘適督帶陸朝珍亦至遂與商酌分三路進攻自午迄申兵氣益奮匪大潰遁奪獲鎗械多件拔出被拉之羣生才等男婦七名口據羣生才稱匪首係大花面黃大蘇萬六鄧八黃六蔡志嘯等五名於是商令李朝興黃家廉由芭口蕪碕截擊胡軍由盤陽繞截陸朝珍跟追十九二十三等日復敗匪於淥光那賓等寨及武緣縣屬之五村匪踞鄧甘高山險峻抗拒我兵鼓勇直上斬獲無數匪乃敗散我兵陣亡副哨武舉沐雲光什長儂有才二名其餘兵勇亦多有傷亡搜剿數日距思郡近百餘里已無匪蹤只以山深林密道遠徑歧未敢窮追分探色思境內匪氛已靖卽飭回色各紮原防等情前來並先後據該督帶陸朝珍王國賓等電稟經臨安開廣道魏景桐廣南府知府王正雅富州通判李世楷查覆情形相同臣查此次柳州勇營甫經肇亂平樂村防哨叛變繼之土匪游匪羣思竄動

股數甚多滇粵邊界在在毗連人心頗覺惶惑泗色一帶尤極空虛署廣西提督丁槐總兵何友山等所部多係撫游滇軍僅止六營懸軍深入孤危可慮幸會剿又閱半年泗色一帶匪蹤漸次盪定邊境又安堪以上紓宸廑現據該道謝汝欽電稱奉兩廣督臣岑春煊廣西撫臣李經羲諭飭添募四營分隸陸胡珍王國賓督帶以厚兵力此後滇粵兩軍自可聯為一氣得旨仍著督飭扼要防堵毋稍疎虞○甲辰電諭奉天將軍增祺賑撫東三省難民

十二月乙巳朔諭朕欽奉慈禧端佑康頤昭豫莊誠壽恭欽獻崇熙皇太后懿旨禮部奏元旦禮儀一摺元旦節皇帝率王公百官著在皇極殿行禮停止筵宴其在外公主福晉命婦均著進內行禮○丙午賞給史念祖道員發往湖北交張之洞差遣委用○電飭駐美使臣梁誠力爭華工禁約○己酉上詣奉先殿壽皇殿行禮○上御皇極殿和國使臣希特斯義國使臣巴樂禮大西洋國署使臣阿梅達等親見呈遞恭賀皇太后萬壽國書○以胡廷幹為江西巡撫楊士驤署山東巡撫○召連順回京調奎順為烏里雅蘇臺將軍以升允為察哈爾都統○庚戌以余肇康為山東按察使○調吳廷斌為雲南布政使張紹華為山西布政使○調黃建筦為江甯布政使以尙其亨為山東布政使○政務處王大臣等奏光緒三十年十一月初六日准軍機鈔交戶部右侍郎戴鴻慈奏請定會議章程一摺奉旨政

務處妥議章程具奏欽此查原奏內稱當今時機孔亟內而新政待舉外而交涉日繁擬嗣後凡內政外交具有建革之大疑難之端由各衙門請 旨飭下政務處摘錄事由標明由內閣各部九卿翰林科道定期會議速者三日五日遲者十日十五日各抒所見另紙錄陳併令傳知屬官咸得論列編檢部員以下呈掌院堂官代遞不必沿會銜之例徒與具文屆時由政務處詳實覆奏仰候 宸裁等語臣等伏維立政必重乎博咨剛治宜資乎公論我 朝大政事大典禮歷來皆奉 特旨下逮臣工集議所以博採異同折衷一是 好問察言之盛德昭然可證該侍郎以時艱日亟請舉內治外交建革之大疑難之端肯下廷議蓋欲竭羣臣壎流之獻廣 朝廷采納之資 執兩用中有裨政治揆諸時勢洵稱切要仰蒙 鑒察令議章程臣等參考成規衡以事理謹擬章程七條繕具清單恭呈 御覽如蒙 俞允嗣後遇有 特旨飭下會議事件及臣工條奏併如該侍郎所奏由各衙門請 諭飭下會議事件均俟奉 旨後由臣處通行知照一體欽遵特 旨如所議行○辛亥政務處奏光緒三十年十一月十八日准軍機處鈔交署兩江總督端方等議裁官缺籌擬辦法一摺奉 硃批政務處吏部議奏欽此查原奏內稱江安糧道已無辦運之責術所屯糧亦經裁歸各州縣清查徵收所事尤為清簡查河南省即以鹽法道兼管糧務江甯現有鹽道似可援照裁併擬將江安糧儲道一缺卽行裁撤所有該糧道管轄

漕務一律併歸鹽法道兼管糧道庫大使一缺應併改隸鹽法道管轄毋庸裁撤此外同通各缺均請一律免予裁撤至應行更置各缺不能不與時變通分別移補廉俸自可照例支給毋庸更張其移駐後一切事宜容再督飭司道悉心經理各等語臣等查該署督因江安河運停辦屯衛已裁糧道事務簡少遂爲裁併之議惟查該道向同兩江總督駐紮江甯省城所有重要局差近年多委該道經理不僅專管運衛現在事艱孔亟交涉日繁該督兼綜洋務鹽務練兵籌餉諸大政亦須多有實缺大員遇事籌商用資贊助查陝西湖北湖南糧道先後裁撤以同城司道較多事務之繁劇亦均非兩江可比今若遽將江安糧道裁併則該省城實缺司道僅有兩員藩司本統治地方鹽道又兼理關務管領均繁是各局所皆將委之候補各員實望過輕殊不足以資表率該糧道一缺自應仍舊設立以重地方該署督所請裁併之處應毋庸議至原奏內所請將蘇州府海防同知一缺移駐太平洲改爲太平廳撫民同知蘇州府管糧通判一缺移駐洞庭西山改爲靖湖廳撫民通判係因該兩處距所轄縣境較遠戶口將庶匪徒出沒微糧緝捕均多不便須設專員撫治查浦縣主簿移駐黃渡鎮荆溪縣主簿移駐梧桐山亦爲因地制宜起見擬請照准兼俸等項仍舊支給其餘一切未盡事宜應由該省督撫查明奏咨辦理得旨如所議行○癸丑前刑部尚書貴恆卒賜卹如例○戊午諭軍機大臣等有人奏西藏情形危急請經營四川各土

司並及時將三廳收回內屬等語。諸錫良有奏鳳全體察情形妥籌具奏原摺著鈔給閱看。將此各諭令知之。○端方等奏東西各國之富強莫非發源於教育。方今時勢艱難。民生日蹙。風俗澆薄。教案疊起。推原其故。皆由人民無普通之智識。鮮謀生之技能。是以初等教育萬不可苟。至於各省待興之利待舉之事。不知凡幾。舉凡教育實業武備諸大政。皆有乏材之歎。不得已而借材於外。經費既鉅。駕馭尤難。則高等教育尤不能不兼籌並計。比年疊奉 上諭。舉辦學堂。並由學務大臣妥定章程。頒行各省仰見 聖主注重根本有加。無已。惟各省皆以經費難籌。辦理不無棘手。奴才等竊謂今日財政之艱窘。實由民智之未開。欲民智之開通。當謀教育之普及。故經費雖支絀萬分。而學堂究不能不辦。收效雖遠。經畫宜先。奴才端方自到蘇撫任。後竊見三吳夙擅文明。而士習漸偷。雖號殷庶。而民生日促。學堂建立尙屬無多。若不急於圖維。勢且奮興無日。是以與奴才效勞竭力籌議數月以來。略有端緒。謹將辦理情形爲我皇太后 皇上陳之。伏查現在興學第一苦乏教員。故師範學堂最宜先辦。查奏定學堂章程。每府須設初級師範學堂一所。每省須設優級師範學堂一所。今限於經費。先於蘇州省城設立兩級師範學堂。先招講習科生四十人。速成課生一百二十人。以濟目前。興辦小學堂之急。需已於十月開學。俟明年講習科卒業。再招初級本科以培養小學堂完全之教員。俟速成科卒業。再設優級科以培養中學堂及初級

師範學堂之教員更附設模範小學堂一所以爲初級師範學生練習教授之地以光祿寺署正羅振玉爲該堂監督該員明於教育管理之法若能假以事權始終經理將來必有成效可觀另於城中設立初級小學堂四十所暫選稍合用之教員迅速開辦將來卽以卒業生承其缺乏俟立優級科後再以蘇州府中學堂附屬該堂以爲優級師範生練習之地如此辦理庶將來教員不至缺乏免致借材外國此設立省城師範學堂及初級小學堂之大略情形也至於蘇州原有中西學堂現已改爲高等學堂但學生程度與中學堂等學科亦未完備名雖高等其實難副只得暫分爲豫備科及本科兩級俟豫備科卒業乃入本科添聘教員置備儀器務令學科完全俾得備師範大學堂學生之選其蘇州府中學堂並增添學科推廣額數由蘇州府認真經理此又業經擴充高等學堂及中學堂之大略情形也若武備學堂本爲今日最急之務蘇州舊有之學堂學科程度甚淺額亦甚少現在必須遵照練兵處奏定新章悉力整頓增廣學額方能望其英才日出以赴今日之急他若實業學堂則以蘇州工業素優農力亦頗勤勉惟不免徯於講習不知進步現雖設有農務工藝兩局然非施以完全教育成效終不可期擬設實業學堂一所分農工兩科此舉於國家本計民生職業地方財賦關係甚大匪可緩圖卽當擇地建堂迅速舉辦此又現擬推廣武備學堂及工藝學堂之大略情形也此外如蘇屬之京口駐防人口日增生計日窘去

歲該副都統設立中學堂一所其構柱艱難深可嘉許而規模狹隘尙待擴充秋間由奴才端方派員前往監察學務兼理旗民生計擬推廣舊有之中學堂兼增設實業學堂及蒙小學堂俾教育一事兩漢不致偏枯旗民均可普及其省外之松常鎮太各府之學堂或因經費不足辦理無人並當設法伙助速行開辦此又兼籌京口駐防及外府各學堂之大略情形也又教科各書急須編譯現在正在招聘通才擇要輯錄惟是諸務並舉需費較多奴才等再四商籌惟有就銅元盈餘極力撙節撥出定款以爲興辦之用惟近來銅價日昂加以各屬鼓鑄日廣銅元利息亦必日薄所冀風氣日開再行勸導民間俾自行興辦初等小學則幣項或可漸紓卽教育亦得以徧及奴才等上承 德意下際時艱惟日孜孜如恐不及又念要政固當舉辦正款不宜虛糜是以奴才端方於到任之初卽首以推廣銅元爲事現幸稍有眉目有款可解嗣後似不難加意講求俾臻完善下所司知之○己未胡廷幹奏東省仿河濱海地瘠多山年來水患頻仍盜賊滋熾治其標則賑調緝捕不過防救已然求其本則教養兼資方足澄治治本伏讀光緒二十九年十月初一日 上諭商部奏請通飭各省振興農務一摺據稱商務初基以提倡土貨爲要義而商之本在工工之本在農非先振興農務則始基不足工商亦無以爲資振興農務之法不外清地畝辨土宜以及興水利學畜牧設立農務學堂與試驗場請飭各將軍督撫通飭各屬將地畝冊土性表

詳細編造報部等語所陳不爲無見著各省大吏速飭各府州縣認真確查極力講求一律切實興辦以廣種植而裕利源欽此又於光緒三十年五月十四日欽奉 懿旨飭令於學校農工諸要政悉心經畫教養兼資等因欽此仰見 深宮勸恤民依所以爲 國家謀富強爲斯民籌本計者至爲深遠下懷欽佩莫司名實維山東爲古青兗之區本以桑土重農名於往代惟以後世民愚農惰漸失其長財匱民窮日甚一日近者東西洋各國考求農法成效昭然卽令裕厚民生非先由農事入手無以爲正本清源之計 接任後鑒於省城設立農桑總會雇聘日本農學士考驗各省農法並於東西關外設圈農事試驗場以便種植標本逐漸擴充泰安兗州沂州曹州濟寧各府州設農商分會隨時查驗地質土宜其餘各縣亦均酌立分會凡屬可興之利可植之物均令試種考驗其兗州青州兩屬本出蠶絲惟以質粗縷劣不能與南綵抗敵臣於兗州府設立農桑學堂於青州府設立蠶桑學堂雇聘杭州蠶桑優等學生充當教習俟頭班學生卒業卽可分遣各屬轉相教導該兩學堂附近地方土人已漸知師法改其耕織舊習又於青州創立東益公司紡織縐布此外則止朝城城武蒙陰等縣分設蠶桑廠冠縣陽信沂水城武一帶試種落花生省城及登萊等屬現設樹藝公司登州一屬地近海濱擬設漁業公司並責令各州縣勸民種樹據報三十餘州縣共試種二百餘萬株將來風氣大開各州縣農桑樹藝一律興辦似於民

生不無小補此臣籌辦東省農桑實業之大概情形也凡富民以農利爲先而教養無業閭民則以工藝爲急東省人多田少不敷耕種連年河水衝沒閭民日多弱者坐守饑困黠者流爲剽竊是以曹州東昌等屬歷年多盜誅不勝誅夏由年壯游閒迫而爲此前升任撫臣袁世凱審知其故先就省城設立教養局專教貧民無業者學作粗工另設工藝一局考求各項精巧工作如范金冶鐵織繡雕嵌之類以爲全省工藝模範上年日本賽會已有出品尙不其劣臣到任後益加推廣添撥兩局經費於教養局附設小學堂以期進而益上又於曹州沂州等府暨濟州莒州嶧縣福山濰縣等處各設工藝分局於鄒縣惠民等處分設教養分局於益都壽張泰安等縣各設習藝所博山設玻璃公司於德州諸城禹城各州縣設草辦公司局廠此外如紡織布製造洋胰洋燭洋酒其未辦就緒或已議未辦者條理尙多臣隨時督飭官紳認真經理以期逐漸推廣加意改良不敢獨於目前苟且敷衍此臣籌辦東省工藝實業之大概情形也惟是時辦事固難籌款尤難臣就現辦各事核計如省城工藝局歲需成本經費二萬兩開辦經費五萬兩省城教養局歲需成本經費一萬數千兩開辦經費二萬三千兩兗州農學堂青州蠶桑學堂省城農桑會各歲需數千兩開辦經費各一萬餘兩他如疏濬小清河招商行駛小輪擇要修理道路以通車馬而興商務又在煙臺開設車阜公司以期內地土貨多販出洋又購買膠濟鐵路股票十三萬餘兩

以化畛域又擬購買嶧縣礦務股票十萬餘兩以圖擴充此外各州縣可開之礦應行招商附股藉資招徠通盤約計每年至少需本銀一百餘萬兩山東庫儲奇絀本無官款可撥現在惟恃籌款局整頓牙帖雜稅商捐等款歲約收銀二十餘萬兩祇能作爲提倡補助之需全恃官商集股推廣辦理籌款局各項商捐初辦民頗不願近來咸知以本省之財辦本省之事且用本省之人核與袁世凱奏設籌款局原議相符民間異議漸息且有恨籌捐無多條陳推捐諸論臣不敢遽行惟就此力量鼓勵官紳核實經理如有不敷准其息借商款將來某項事業辦成確有明效或予以專利或酌量請獎隨時咨商商部核准照行再所辦各項地方要政現雖官督紳商經理實則仍係民捐民辦且捐款本少股分較多所有經費臣已飭司道督查按年列表造冊俾衆公閱請免按例報銷下部知之○庚申林紹年奏滇省瘠苦先後奉派籌款認解四五十萬之多實已極形匱乏恩飭部立案以後凡有派解之款免其再派以重巖疆而甦民困下戶部知之○辛酉 上諭 大高殿祚雪○袁世凱等奏關內外鐵路前因籌造中後所至新民屯及營口各路並歸還津海津蘆欠款於光緒二十四年四月經臣燊堃向英商匯豐銀行籌借英金二百三十萬鎊訂立合同奏准施行查該合同第三條載關內各路產業並全路腳價進款應儘先作爲借款之保又第八條載各路收款進款應存天津匯豐銀行所有經理修路應用各費均由該局進款

項下開支俟有餘剩備還此款之用各等語歷經照約辦理二十八年全路交還一切善後修路等需並付還聯軍管路時所購材料欠款及解付官商股票本息爲數不資動形竭蹶迭飭總辦鐵路局員認真整頓興利除弊俾路政漸著成效適值東路不靖中國嚴守中立凡有戰例禁貨概不裝運關外一路進款短絀兼以運送官物折收半價暨紅十字會籌舉運腳全免收數尤形減少且所訂借款合同已屆還本之期逐月按表籌還本息未能須臾或緩該路用費日見浩繁而進款又不無窒礙經該局總辦道員梁如浩等督率華洋員司切實經營洪纖畢舉遇事殫心籌畫設法招徠使全路一千五百餘里商貨流通貿易往來日見興盛所收車腳進款頓形暢旺除一切開支暨按月攤還借款本息外約共計存餘銀一百八十餘萬兩等以 國家創興此路曾撥鉅帑現該路存款漸多自應爲公家酌撥餘利因飭該局員與華英公司商辦該公司拘泥成約初未肯稍示通融磋商再三甫克就範當於匯豐所存餘款一百八十餘萬兩內提撥天津行平銀五十萬兩作爲公家餘利據該局總辦道員梁如浩等詳請具奏前來臣等查關內外鐵路進款照原訂合同應存匯豐銀行其開支餘剩之款備還借款本息今該路進款於按約開支及歸還本息以外既有盈餘復於餘款內提存鉅數解濟公家際此帑絀時艱洵於度支有裨下部知之○壬戌諭軍機大臣等有人奏湖北宜城縣河西地方因清丈車戶地畝知縣沈俊勸捐苛

派典史李榮恩等相助爲虐請飭查辦等語著張之洞按照所參各節確切查明據實具奏毋稍徇隱原摺著鈔給閱看將此諭令知之○給事中熙麟奏伍廷芳盛宣懷辦路受賄得旨著岑春煊張之洞密查具奏○周馥等奏各國水陸各軍無不號令齊壹聯合一氣雖有分合聚散絕無不可歸一將統御之理亦無兩軍不能合隊之事中國從前創辦海軍因限於財力先辦北洋而南洋則因陋就簡規模未備近年以來獨有兵船益形贏朽徒糜餉項無裨實際且管駕各官亦多不諳方略是以前著督臣張之洞有裁汰舊船之奏臣此次南來察看各兵船亟應分別裁留認真整理非定章程不能革除舊習非專派大員督辦不能造就將才查有現統北洋海軍廣東水師提督葉祖珪本船政學堂出身心精力果卓著賢勞若將南北洋各兵船歸併該提督統管凡選派駕駛管輪各官修復練船訓練學生水勇歸其一手調度南北洋兵艦官弁均可互相調用現在兵艦雖不足一軍之數而統御巡防江海一軍有此以鎮之則均屬堪用卽南洋水師學堂上海船塢兵艦餉械文應一切事宜有與海軍相關亦堪歸併准該水師提督考核會商各局道員切實整頓前委管駕各官有於海軍尙欠練習者酌量撤換庶幾規模畫一官弁無濫竽倖進之弊畛域無分調遣收拾角相輔之用氣象較前益壯將來擴充辦理軌度不致有差下部知之○袁世凱奏現在財政支絀京外略同一旦欲驟集鉅金會貸欸外別無良策惟募集洋債利息

輕重常受挾持鈔價漲落復多虧損查外洋各國遇有軍國要需率皆臨時募債不分本國外國而踴躍輸將常逾定額固由國民急公効義使然而最要關鍵尤在上下相孚絕不失信中國歷來辦理公債半由官吏不務達國鮮克踐言以致民間公債輒多觀望不前卽或勉集鉅貲亦率視爲報効不敢希冀償還祇求取辦一時而於國民維繫之機相去甚遠利國便民之政轉爲誤國病民之階臣誠私心痛之今欲開募債票宜自公家嚴守信實俾民間便利通行方足以挽澆風服天下然示信之道非可空言又宜預籌的款備償本息無論何項不得挪用又准其交納本省庫款關稅各項隨處皆可兌用信如四時令如流水既易籌集尤便推行在國家無利源外溢之虞在商民得子母流通之益維挽民心恢張國力皆在此舉經臣詳酌中外章程以取信便用爲宗旨就本省籌款歲可得銀一百二十萬兩計可貸公債銀四百八萬兩第一年按七釐付息逐年遞加一釐分六年還清以所籌之的款備付本息有盈無絀其期限數目章程暨籌定款項另繕清單恭呈 御覽抑臣更有請者此事係屬創行計在久遠一或蹉跌繼後爲難中國積習往往始事者備極艱辛而當新舊代易之交輒解後先規隨之美不以紛易定章爲才卽以推卸責任爲事號令不行官民不信斷由於此此項公債票如蒙 俞允試辦擬請 降旨作爲永遠定案並責成臣暨布政使鹽運使並繼任之督臣等倘有違改定章失信於民者照誤國病民論予以

應得之罪庶天下士庶曉然知 朝廷於公債一項實力信行斷無更改方足以裨助國用收集利權
上諭袁世凱奏擬試辦直隸公債票一摺外洋各國遇有軍國要需臨時募債無不聞風踴躍獨中國辦
理公債輒多觀望不前良由官吏不能踐言民信未孚之所致茲據該督奏稱開募債票以取信便用爲
宗旨洵爲扼要所陳籌有的款按年付息分年還本發給票據准其交納本省庫款關稅各項並隨處皆
可兌用擬具章程尙屬周妥卽准其試辦仍責成直隸總督暨藩運兩司無論現任接任各員一體認真
經理實力奉行此次奏准之後作爲永遠定案斷無改易倘該官吏違章失信仍蹈前轍或啟弊端定行
從嚴治罪決不姑寬○癸亥諭軍機大臣等有人奏直隸安州知州鄭思任縱盜殃民既貪且酷請飭查
辦等語著袁世凱按照所參各款確切查明據實具奏毋稍徇隱原片著鈔給閱看將此諭令知之○諭
軍機大臣等有人奏湖南柳州知州施啟宇貪刻營私草菅人命請飭查辦等語著端方按照所參各款
確切查明據實具奏毋稍徇隱原片著鈔給閱看將此諭令知之○甲子商部奏商人貿易之事各有自
定牌號以爲標記使購物者一見而知爲某商之貨近來東西各國無不重視商標且爲保護與製造專
利之法相輔而行中國開埠通商垂數十年而於商人牌號向無保護章程此商牌號有爲彼商冒用者
其貨牌號有爲僞貨攙雜者流弊滋多遂不免隱受虧損今日部綜綰商務業將一切保商之政次第舉

辦則保護商標一事自應參攷東西各國成例明定章程俾資遵守上年迭准外務部咨據英日各國駐京使臣先後照稱續議通商行船條約內英約第七款載有互保貿易標牌一事美約第九第十十一各款日約第五款均載明保護商標及圖書版權專利各項請即設局開辦註冊事宜等情並將總稅務司赫德代擬商標註冊章程鈔送到部等伏查英約簽字係在光緒二十八年間其時臣部尚未奉旨設立故約內有由南北洋大臣在各轄境內設立標牌註冊局所派歸海關管理之語迨美日約簽押則在臣部開辦以後故并未載有南北洋設局字樣現經臣等公同商酌擬將標記註冊事宜即在臣部設立總局選派專員妥慎經理并令津海江海兩關設立掛號分局商人以標牌呈請註冊除在總局掛號者照章核辦外其在津滬兩關分局掛號者由分局轉送總局核辦俟應發照時仍照原掛號處轉給收執庶事權歸一而辦法可免紛歧現當開辦之初所有一切條目章程尤宜博考詳稽以期周妥茲將總稅務司代擬註冊條款詳加釐訂復由臣等採擇各國通例參協中外之宜酌量添改擬定試辦章程二十八條謹繕清單呈 御覽如蒙 俞允應由臣部刊刻頒行定期設局開辦并飭津滬分局遵照辦理此項章程原以各商陸續投票而請註冊等是以擬請先行試辦嗣後如有應行增改之處統俟彙入商標通律輯成編再行奏明恭候 欽定至商標原為保商之要舉無論華洋商既經照章註

册自應一體保護以示不允惟英美日三國續定商約皆以互保爲言如有華商牌號在英美日註冊者
彼國亦允保護此外通商各國續議約章尙未訂定應由商部咨明外務部照會各國駐京使臣聲明
部奏辦商標註冊章程係准華商洋商一律遵辦應商明未經議定商約之各國政府查照通例亦允保
護華商牌號先行照擬備案俟定約時一併列入以免參差而昭睦誼得旨如所議行○商部奏光緒
三十年十一月初一日接據商部左參議王清穆函稱商業之盛衰視乎商路之通塞商路有二曰軌路
曰水路東西各國軌道綽綽而於開通航路國家且歲籌補助用是商業繁衍運輸利便民富而國強中
國物力支絀軌道未能四達幹支各路往往借款籌辦利權坐失長江流域其行輪之權亦幾久與外人
共之清穆以爲其造端雖微而裨效甚宏足以植商之基礎者莫如內河航路一事凡軌路之尙未通者
可藉航路接接之凡軌路所不能達者可由航路轉輸之以清穆所經江鄂諸省而言若漢湘若九南若
鎮揚鎮浦若蘇杭蘇滬常鎮各航路四通八達往往爲外人所經營其所設公司多不過數萬金視軌路
之動需千百萬者難易迥殊華商之力尙能興辦洵爲今日亟應注意之舉可否仰懇奏請飭下各督
撫查明所屬境內其有航路交通處所於華商所設行輪各公司亟予保護其未曾設立者提倡籌辦如
因河道淤塞有礙商運飭各州縣會同本地紳商詳加查勘設法開濬以期交通轉輸便捷內地土貨且

相繼注於商政大有裨益一面由部頒定表格札飭各省商務議員查明內河行輪已設未設處所無論官股商股或量加擴充或合力創辦填註報部合各省之力保全航路事向易爲清釋爲開通商航路起見理合懇請察核施行等因前來臣等伏查中國幅員廣博物產豐饒祇因腹地轉輸阻滯遂致商貨未能流通商業難臻發達惟沿江沿海各行省川流交錯航路縱橫故商務亦最稱繁盛近年江浙閩粵等省通商口岸先後設立輪船公司常川行駛內河運載客貨尤爲便捷情乎由洋商創始於前而華商從事於後利權既分遂有難與爭衡之勢是現在內河業經行輪處所亟宜提倡華商添設公司實力推廣以爲抵制補救之策況近年與英日等國續議內港行輪修補章程已許該國商人指明內港設輪行駛事載約章勢難閉拒各省內河凡屬連接通商口岸按照約章外人例准行輪者尤應官商合力佔先興辦藉免利權外溢該參議所陳各節不爲無見擬請 旨飭下沿江沿海各督撫查明該省內河華商設立各輪船公司者應飭令該管地方官力爲保護其僅有洋商設輪行駛暨輪船猶未通行體察該地情形外人援約呈請勢難禁阻者尤當勸諭華商厚集資本分別預籌辦理一面飭屬詳細勘測遇有河道淤塞阻礙行輪之處應卽設法疏浚以暢航路並由臣部酌定表格札飭各省商務議員將各該省內河已否行輪處所調查確切繪圖貼說迅速呈部其行輪一切事宜應均按照光緒二十四年總理衙門

所定內港行輪及近年英日等國所訂商約各章程辦理至船隻載重噸數更宜審慎安定以免疏虞嗣後所有籌辦情形並即隨時報告以憑稽核總期官商聯給逐漸推廣俾已設者力與爭衡未設者佔先興辦庶於挽回利權維持航業均有裨益得 旨如所議行○乙丑雲○丙寅政務處奏光緒二十年十一月初八日軍機處鈔交前署兩江總督端方代奏修撰張騫條陳徐州宜建行省一摺十二月初六日鈔交御史周樹模奏請裁漕運總督一片均奉 旨交政務處議奏欽此查二十八年調任漕運總督陳夔龍奏稱漕督名實不符而所管河湖各工及地方盜案均屬重要應否裁撤等語當經臣等議覆暫緩裁撤茲據該御史奏稱各省衛官已撤屯戶並改丁糧歸州縣經徵南漕半改折色半由海運各省糧道亦次第裁減漕督無官可轄而體制極崇殊非綜核名實之道各等語該修撰請在徐州建設省會亦以裁撤漕督爲言徐州在江蘇地居最北若於平地創建軍府既多繁費所請分劃江蘇安徽山東河南四十餘州縣亦涉紛更今昔形勢遷變無常漢求迄唐淮徐代爲重鎮宋及金元之際則徐已降爲散州至明以來則注重淮安歷爲前代漕督及 國初廬鳳巡撫後改漕督駐紮之地及江南河道總督裁撤漕督移駐淮城迤西之清河縣實爲綰轂水陸之衝北連徐海南控淮陽地既適中勢尤扼要伏查前明初設漕運總督卽兼巡撫地方 國朝順治六年裁廬鳳巡撫改漕運總督仍兼巡撫事漕督之兼巡撫原

爲控制得宜現漕務雖已改章地方實關重要與其仍留漕督徒擁虛名不如選設巡撫有裨實用臣等
公同商酌擬將漕運總督一缺卽行裁撤改爲巡撫仍駐清江照江蘇巡撫之例名爲江淮巡撫與江蘇
巡撫分治仍歸兩江總督兼轄一切服俸餉項衙署標營均仍其舊但改漕標副將爲撫標參將以符定
章而兩江總督駐江甯布政使所轄江淮徐揚四府通海兩直隸州江蘇巡撫駐蘇州布政使所轄蘇松
常鎮四府太倉直隸州海門直隸廳久若舊疆而治現於江北擬設巡撫應將江甯布政使及所轄之四
府二州全歸管理巡撫所駐卽爲省會應就近將淮揚海道仿照新疆鎮迪道例兼按察使銜所有江甯
各屬刑名均由該道勘詳巡撫奏報江甯布政使應隨總督仍駐江甯總督在江南巡撫在江北既無同
城偏處之疑江甯六府州前隸蘇撫者卽改隸淮撫亦無增多文牘之擾不必添移一官加籌一餉而行
省已建職掌更新建擬合宜名實相副惟事關改建行省且係兩江總督江蘇巡撫管轄之地各有責成
所有未盡事宜應請 飭下兩江總督漕運總督江蘇巡撫體察情形悉心妥議奏明辦理 上諭政務
處奏議覆裁改漕運總督一摺江北地方遼闊宜有重鎮順治年間改設漕運總督原兼管巡撫事現在
河運全停著卽改爲江淮巡撫以符名實而資治理卽以原駐地方爲行省江甯布政使所屬之江淮揚
徐四府暨通海兩直隸州全歸管理仍著兩江總督兼轄各專責成○丁卯 上詣 大高殿祈雪○上

御乾清宮閱兵跋○調恩壽爲江淮巡撫以陸元鼎爲江蘇巡撫○己巳開復降革協辦大學士禮部尚書徐卬前馬關鎮總兵理藩院右侍郎林岫盛京將軍增祺署兩廣總督岑春煊前廣西巡撫調補貴州巡撫利逢時興京副都統靈熙山海關副都統倭恆額等○辛未 上御中正殿閱跳步札○壬申哈祭太廟 上親詣行禮○是年墨西哥國遣專使鄒華來修好○統計出口貨直銀二萬三千九百四十八萬六千六百八十三兩進口貨直銀三萬四千四百六萬六千八百八兩相抵虧一萬四百五十七萬三千九百二十五兩凡徵貨稅銀三千一百四十九萬三千一百五十六兩

光緒一百九十一

臣朱壽朋敬編

臣潘鴻鼎恭校

光緒三十一年乙巳春正月甲戌朔寅刻 上詣 泰先殿行禮畢詣 堂子行禮辰刻詣 皇極殿行禮已刻御中和殿受禮太和殿受賀午刻詣 大高殿 壽皇殿行禮御乾清宮入宗親宴○乙亥蠲緩直隸武清等州縣被水田糧○丁丑 慈禧端佑康頤昭豫莊誠壽恭欽獻崇熙皇太后 皇上御乾清宮德國使臣穆默英國使臣薩道義日本國使臣內田康哉法國使臣呂班荷國使臣希特斯比國使臣瑪飛業義國使臣巴樂禮日國署使臣賈思理大西洋國署使臣阿梅達墨國代辦使臣烏海慕美國署使臣固立之韓國署使臣朴台榮奧國暫代辦使臣副領事盧達偉觀兒賀年○諭上年山東被災各州縣業經分別蠲緩小民諒可不至失所惟念今春青黃不接之時民力未免拮据加恩將被災之濟寧等州縣應徵本年上忙錢漕租課等項均分別緩至本年夏後及秋後啟徵其坐落該州縣境內之寄莊盤課與裁併衛所並承阜等場均隨同民田一律辦理以紓民力該部卽遵諭行○辛巳祈穀於 上帝○癸未以敖漢扎薩克郡王勒恩扎勒諾爾贊在京身故賞銀五百兩治喪○乙酉 上御乾清宮總稅

務司赫德主教林懋德劉克明親見賀年○丙戌 上詣 奉先殿 壽皇殿行禮○上御紫光閣入宗

親宴○調吳廷斌爲山東布政使劉春霖爲雲南布政使曹鴻勛爲湖南布政使以袁開第爲貴州布政

使○戊子 上詣 大高殿 壽皇殿行禮畢御保和殿筵宴○以陳燦爲雲南按察使○己丑 上御

紫光閣入廷臣宴○壬辰 上御紫光閣賜蒙古王公筵宴○諭軍機大臣等有人奏安徽前任旌德縣

現任雲邱縣知縣李邦慶昏庸貪酷濫刑釀命等語著周馥按照所參各節確切查明據實具奏毋稍徇

隱原片著鈔給閱看將此諭令知之○廣西巡撫李經羲奏軍餉緊迫請將所有應解上年九十兩月鹽

本年四箇月洋款一併緩解允之○癸巳諭熙凌阿奏籌墊鉅本整頓鹽綱一摺鹽法爲國家大政關係

民食國課自應責成該管官吏保商暢運力除積弊以裕餉源乃該員勒奏稱整頓天下鹽綱已籌定運

本銀三百萬兩先從長蘆辦起請派大臣督辦並保魏鴻儒等深資贊助應准奏調差遣等語無非爲墮

斷專利起見其爲受人指使情節顯然實屬荒謬熙凌阿著從寬免其議處仍傳旨嚴行申飭○楊樞奏

伏讀光緒二十六年十二月初十日 上諭世有萬古不易之常經無一成罔變之治法大抵法久則敝

法敝則更要歸於強國利民等因欽此仰見我 皇太后 皇上軫念時艱變法自強之至意惟是變法

之要首在於多儲人才明定宗旨誠以人才多則辦事易舉宗旨明則家志不惑即如日本於明治維新

之初歲遣學生多人游學歐美分習諸科並於本邦設速成司法學校令官紳每日入校數時專習歐美司法行政之學以應急需又宣發誓命先定爲立憲之國然後開議會決公論一切變法之事皆依立憲政體而行故能次第敷施有條不紊變法未久而驟臻富強也中國與日本地屬同洲政體民情最爲相近若觀變法之大綱似宜仿倣日本蓋法美等國皆以共和民主爲政體中國斷不能仿倣而日本立國之基實遵守夫中國先聖之道因見列強逼處非變法無以自存於是盡意立憲以尊君權而固民志攷其立憲政體雖取法於英德等國然於中國先聖之道仍遵守而弗墜是以國本不搖有利無弊蓋日本所變者治法而非常經與 聖訓正相符合卽中國輿論亦以日本之變法參酌得宜最可仿倣邇者學務大臣暨各省督撫陸續選派學生來東就學綜計人數已逾三千然其中習普通科者居多習法政專門者尙少緣日本各學校授此等專門之學皆用本邦語言文字中國學生從事於斯者須先習東語東文方能聽受講義約計畢業之期總須六七年夫以大七年之久非立志堅定者鮮克成功所以多畏其困難而不願學其可惜也上年日本之公使近衛篤磨子爵長岡護美因感戴我 朝賞賚寶星之榮曾與前總監督汪大燮會議欲於日本東京爲中國游歷官設速成法政學院學畢甫擬就而汪大燮已卸任近衛篤磨旋身故事遂中止 奴才抵任後思設法續成之適有東京法政大學校總理梅謙次郎亦建

斯嚴奴才當向長岡薩美取得前擬學單作爲稿本而梅謙次郎酌中改定遂於該學校內特設法政速成科專教中國游學官紳奴才均竭力贊成日本文部亦經認可開學之日中外士商來觀者千有餘人日本各部院大臣亦來頒祝禮甚隆重奴才一面分咨各省大吏請選派官紳資遣來學現在京師學務處暨直隸江蘇安徽福建浙江湖南廣東等省督撫均經照議選派統計來學官紳已有三百餘人預定大箇月爲一學期滿三次學期便可畢業其教授大旨約分四科曰法律曰政治曰理財曰外交所聘諸科教習皆日本最有名之學士博士每日講義各教習以東語口授而令通譯人以華語傳述之此等通譯俱係中國優行生曾在法政大學畢業學有根柢者奴才仍恐各學生於聽講時不能一一領會又與各教習商允將每日講義以東文筆之於書而令通譯人譯出漢文編印成帙分授各學生俾得隨時研究此外尚有實地體驗之法舉凡司法行政衙門及官私所設物業有關於政治之學書俱由各教習隨時率領本科學生前往參觀稽實考證昔日本政府設速成司法學校時亦係聘別國人充教習用本邦人作通譯成效最著今居顯要之位由此學校出身者數蓋不數第外國之法律條籍紛繁蒐討難盡所謂速成科者係將法理之所以然及各國法律之得失互相比較擇其適於中國之用者則詳加講授其餘姑置不論以免多費時日學非所用現在中國興辦鐵路礦務商標銀行等事均須參用外國之法

始能攸往盡利是以上年欽奉 明詔修改法律 聖謨廣大中外共仰查日本從前法律與中國同而與歐美異故通商各國亦向日本索有治外法權迨日本頒布憲法之後通商各國方允將條約更正可見修改法律乃今日切要之圖況各省教案多因本地官紳不諳外國法律以致辦理失宜釀成交涉現在中國惟有將法律修改庶可查照近年中英通商條約第十二款中日通商條約第十一款內所載與各國公議將治外法權一律收回不受外人挾制然則外國法政之學上下亟應講求不宜稍緩是科之設不習日語日文便可進講專門之學較之入他學以六七年之功修始得一完全之科學者誠爲事半功倍奴才自當隨時策勵諸生勤加研究以期他日成材上備 國家之用下學務大臣知之○陸潤庠等奏伏讀光緒三十年十二月二十二日 上諭政務處奏議覆裁改漕運總督一摺江北地方遼闊宜有重鎮順治年間改漕運總督原兼管巡撫事現在河運全停著卽改爲江淮巡撫以符名實而資治理卽以原駐地方爲行省江甯布政使所屬之江淮揚徐四府暨通海兩直隸州全歸管理仍著兩江總督兼轄各專責成餘依議欽此竊思政務處此議係就修撰張謇條陳變通辦理惟設官分省事有關繫者數端不可不察請爲我 皇太后 皇上陳之江淮江蘇若合爲一省則名實不符昔有控扼兩省設爲重鎮者如 國初偏沅巡撫之例至一省兩撫向所未有現在湖北雲南本有之巡撫甫經議裁而江南

一省忽然添缺未免政令紛歧此其有關繫者一也蘇淮若分兩省則要政首在定界自古經營疆里必因山川阨塞以資控制設險守國蓋在無事之時溯自蘇皖分省已非復舊時形勝而蘇省跨江尙有徐淮得力據上游之勢今畫江而治江蘇僅存四府一州地勢平衍形勝全失幾不能自成一省較唐之江南道統州四十二宋之江南路統州十四亦復懸殊惟南宋浙西一路僅有三府四州此偏安苟且之圖非盛朝所宜取法至巡撫藩司專管地方之事例駐省城今設省清江會臨江扼要之名城就濱河一隅之小邑似亦未甚得勢此其有關繫者二也國朝經制分省三等蓋因戶口之多寡亦視幅員之廣狹各行省中惟山西貴州兩小省幅員最狹今蘇淮分省江淮地勢較寬僅及中省江蘇則廣輪不足五百里較山西貴州殆尤褊小勢不能再稱大省若改爲小省則一切經制俱需更改而籌餉攤款尤多窒礙此其有關繫者三也漕運總督所委漕務人員皆係地方官吏又有屯政軍政多與地方相附麗定例兼管巡撫事者所以重其事權初不資以吏治且淮徐之去江寧遠者僅數百里不爲鞭長莫及而三府二州之地特設兩道一鎮固已控扼要區布置周密其地方要政向由藩司稟承總督以爲治理歷久相沿未聞有所叢脞今之改設似出無名若江寧辦事悉仍舊貫則江淮巡撫孤懸虛寄徒多文移稟報之煩無裨吏事軍政之要此其有關繫者四也竊謂江蘇跨江立省定制已久疆宇宴安官吏無闕朝廷

本無分省之意江督亦無廢事之虞顧以裁漕督而添巡撫因設巡撫而議添行省辦法既疑乎倒攷定章必歸於遷就伏查同治三年御史陳廷經條陳變通疆輿奉 旨交前兩江總督曾國藩等酌度形勢妥籌具奏曾國藩援據古今劃切上議有謂疆吏苟賢則雖跨江淮而無損於軍事吏事之興疆吏苟不賢則雖盡江分治而無補於軍事吏事之廢此等大政似不必輕改成憲等語其時江南甫定政多興革而特詳慎於此者仰見 廊廟之虛懷老臣之深識前事不遠可備參稽現在設官分省雖山政務處議奏奉 准而辦理章程尙待部臣督臣議擬似事局未爲全定謹考政務處奏定會議章程七條其第二條內開查內政之關係者如官制裁改新設行省等類山各衙門請 旨會議或 特降諭旨舉行此次興革大政適相符合立法期於必行更制亦求盡善可否援照新章恭請 飭下廷臣會議並 飭下沿江督撫臣一體與議擬奏請 旨遵行俾見 朝廷有博採羣言之美無輕改成憲之疑臣等籍隸該省情形稍悉不敢有所見而不敢不謹摺具陳不勝待 命悚惶之至奏入不報轉交政務處按照奏定章程會議具奏○鐵良奏奴才於上年承准軍機大臣字寄光緒三十年七月初七日奉 上諭前有旨派鐵良前往江蘇等省查勘移建製造局廠事宜並查各省進出款項現在武備關緊要屢經降旨飭令各省切實整頓痛除積習著鐵良於經過省分不動聲色將營隊酌量抽查兵額是否核實操法能否合

宜一切情形據實具奏欽此欽遵仰見 朝廷篤念戎行力圖整頓之至意欽服莫名奴才當於經過江南安徽江西湖南湖北河南等省將近駐紮各營詳加校閱查其中軍容整肅操法嫺熟者固屬不乏而故見未除諸多敷衍或新操自詡僅得皮毛者亦所不免至如礮臺水師武備學校或爲慎固江防之舉或係培養將才之區於戎政均有關係因順道一併逐細考查謹將校視情形分礮臺陸軍水師武備學堂四條敬爲我 皇太后 皇上繕晰陳之一礮臺江蘇省礮臺計分四路曰吳淞口曰江陰曰鎮江曰金陵第一路吳淞口礮臺在寶山縣城南北之南石塘獅子林等處分設三臺面海負塘控制南北洋來路爲由海入江第一重門戶形勢最爲險要置前後膛大小礮位三十四尊新式者居其大半總管官一員專臺官三員教習司事電機測繪瞭望燈旗號令共十九員名礮目勇三百八十九名分駐各臺南石塘獅子林之間小沙背地方設水旱雷營二哨管帶一員大小官兵三十四員雷勇一百七十四名並有徐州鎮標中營游擊戴鶴松統領南洋續備盛字五營分紮各臺左近以資防護查該臺前面扼有深濠排釘橋木足禦風潮礮側皆有隔堆深池滑落敵彈又有察遠鏡瞭望臺以窺海中敵艦布置尙妥惟護牆陡直而薄難禦大礮礮無障甲易受敵擊機件亦多應修置礮地基不堅施放多次一有偏舛卽不能取準臺內子藥庫高出牆角之處著彈卽燬後路未設早臺亦屬空虛難守護臺營壘距離過近敵彈

若由臺上起落易爲所中總臺官栢林營都司張克謨似有嗜好不明礮理平時操練悉詢之教習礮目
勇年力精壯手法尙熟惟試以打靶多未命中是於測算諸學未經講解之故第二路江陰礮臺在縣城
迤北於長江南北岸分設礮臺南臺依山北臺傍堤中隔江面三里航路極狹不獨防吳淞來路若敵艦
由崇明縣北循白茅沙駛奔狼福此處適當其衝爲下游扼要總口南岸鵝山西山頂東山東山頂
黃山四峯及大石灣小石灣等處置前後膛礮位三十七尊北岸天生港十圩港等處分置前後膛礮位
二十尊大石灣十圩港礮位間有殘舊作廢者餘礮尙多新式總臺官一員專臺官五員英教習一名華
教習二名司事測繪機匠燈旗號令共十八名礮目勇四百三十五名分駐各臺大石灣天生港附駐水
旱雷一營計三哨官弁九員名匠目雷勇學生二百三十六名歸吳淞小沙背管帶兼轄並有江南海門
營副將丁華容統領南洋續備老洲合字五營及兩江補用副將陳東陽統領南洋續備南字甲左右三
營分紮南北岸各臺後路丁華容並兼理臺務查南岸山頂礮位居高臨下擊路極寬惟臺設明處太無
遮蔽左近多山若敵人攀登窺擊易有危險後路無旱臺空虛難守北岸地勢卑濕礮位較未得力總臺
官江南外海水師補用千總鄒編通曉英語礮理粗諳但工夫不純稍有嗜好統領丁華容略知新學於
防務頗思整頓礮目勇操步操礮均尙熟悉南岸打靶間能命中其餘藥庫兵房位置欠妥護牆太薄機

件應修與第一路略同第三路鎮江五處礮臺一團山關一東生洲一象山一焦山一都天廟團山關東生洲據鎮江下游堵截江陰來路江寬三里許兩岸夾擊極得形勢南岸團山之大礮頭二礮頭團山頭等處置前後礮位十五尊北岸東生洲係平臺置前礮六尊專臺官二員教習二名司事旗號機匠電匠共十名礮目勇二百二十九名分駐各臺並有兩江補用參將徐萬福統領南洋續備新洲左後兩旗分紮防護由團山關上駛六十餘里鎮江府城東北南岸象山北岸都天廟中流焦山分設三臺焦山孤危聳峭橫互江心水勢劈分由左右抄過合流下注江面僅四里餘極稱天險象山南小口新河口東西兩峯分置前後礮位十八尊焦山麓腳頂峯分置前後礮位六尊都天廟係平臺置前後礮位九尊總臺官留甘補用知州劉廷桂統轄全路專臺官三員英教習華教習各一名旗號機匠十三名礮目勇三百五十四名分駐各臺並有新洲中前右三旗及兩江補用副將魏榮斌統領江南武威新軍六營分紮南北岸就近防護新湘軍統領徐萬福並節制全臺查團山關各臺後路無交通之徑彼此難以援應置礮地位間倚危崖陡壁敵礮擊射山石橫飛恐鮮立足之地運道峻直經雨土滑陟降不便東生洲地勢平衍礮位羅列太密中無隔堆兵房湫隘潮濕兵易染病目兵演試手法尚不生疏體質亦壯象山東臺爲右旁沙嘴所阻敵艦若從下游升徒口來不能迎擊東臺礮少西峯礮高均恐不易制敵都天

廟西臺偏後礮彈出口必須超越東臺較有不宜東臺位置尙合猶未適當敵衝焦山下臺礮皆舊式頂
峯兩快礮尙能擊遠命中目勇操礮手法尙靈步操體操英教習勒克里用華語教練悉合法度整齊可
觀總察官劉廷桂人尙明白於礮學亦略窺門徑第四路金陵城內外七處礮臺一烏龍山一幕府山一
下關一獅子山一富貴山一清涼山一雨花臺烏龍山礮臺距省城四十餘里雄踞南岸爲鎮江上游第
一要衝分設五臺置後膛礮快礮十二尊專臺官一員教習一名機匠燈旗號令三名礮目勇一百三十
名幕府山礮臺在北門外六里許山勢雄峻屏障右岸俯瞰江流涵蓋一切仿連珠法依次置礮七尊迤
西老虎山形勢較低置礮四尊專臺官一員教習一名司事機匠燈旗號令四名礮目勇一百三十名下
關礮臺踞金陵城外西北隅東西對岸各一區附近城垣濱臨江濱名都大埠膏腴以爲屏蔽足扼上下
游之險東岸置後膛地藏礮二尊以機上下裝放便捷西岸置前膛礮八尊快礮二尊專臺官一員教習
一名測繪燈旗機匠號令四名礮目勇一百二十九名獅子山在侯鳳門內蟠踞會城西北巍然高聳枕
鍾山瞰長江城垣附麗其上分設東西兩臺置後膛礮快礮八尊專臺官一員兼管富貴山清涼山雨花
臺各臺司事燈旗機匠號令四名礮目勇九十二名富貴山在太平門內鍾山之麓踞其崇阿北聯幕府
山後路西與侯鳳門外營壘足相呼應專防會城東北陸路置後膛礮四尊連珠快礮二尊礮目勇四十

四名清涼山在西門內西南隅依城爲臺背山面江兼控水陸置快礮二尊礮目勇十四名雨花臺在聚寶門外專防東南陸路來敵置快礮二尊礮目勇十四名查金陵一路礮臺烏龍山扼下游來路蔣府山下關逼近省垣足禦敵人登岸復有獅子山等臺分布於內外四周防方可稱堅固惟烏龍山礮雖新式操法近生蔣府山西臺太低施礮時恐於東臺有礙目勇操法生熟參半下關礮臺無望敵之處做法亦屬目兵操法從容嫻熟頗爲壯觀獅子山礮位相距太近恐難全力迎擊目勇操法尙可富貴山東有嶼嶺未經設防不無缺略目勇操法尙足與下關獅子山相埒清涼山藥庫建於暗處甚屬得法目勇操法未盡熟悉雨花臺孤懸城外防守甚難藥庫地勢大低目勇操法與清涼山相似總臺官王世綬通曉英語礮理操法胥知講求故其布置一切較他路稍爲優勝安徽省礮臺計分四路曰東西梁山曰攔江礮曰前江口曰棋盤山第一路東西梁山礮臺在和州屬境由下關上駛百三四十里爲入皖第一重門戶兩山對峙中隔江面五六里地基尙屬得勢東臺置前後膛礮位十四尊西臺置前後膛礮位十二尊安徽撫標續備精健前營中前後三哨分駐兩臺以管帶一人經理並無臺官礮勇卽以步兵操礮兩臺均用以防城礮從女牆探射名曰礮臺無異營壘礮位中之前膛者固屬舊式卽後膛者亦係前膛改造礮敵萬不能適用第二路攔江礮礮臺距安慶省城四十餘里臺設西岸江面極狹置前後膛礮位十五

其式與東西梁山略同安徽續備步隊中營駐紮此處目勇老弱者甚多不知操礮卽步操亦欠整齊其礮池已可概見第三路前江口礮臺在攔江礮上游十餘里據東岸高阜設上下兩臺置前後礮車礮十二尊由續備中營撥兵分紮上臺就山形布作圓式與下臺聲氣聯絡惟置礮處所上覆尖頂錫棚易引敵目其餘與下游同第四路安慶東門外棋盤山礮臺設北岸周以土圍右跨城垣左臨曠野平地建築地勢甚不合宜置大小前後礮六十八尊本屬無用續備步軍前營駐紮此處官兵難語強壯查該臺前面江水既寬且深隨處皆可偷渡臺基太低不克爲高擊遠省垣要地此等礮臺未可恃以無恐江西省礮臺計分四路曰馬當礮曰湖口曰金雞坡曰岳師門第一路馬當礮臺在彭澤縣城東三十餘里爲由皖達贛門戶設南岸山勢峻直正對骨牌洲水路極狹踞山之高處分設五臺置大小快礮五尊均有護礮甲正副臺官各一員燈旗號手一名礮日勇六十名官係學堂出身目勇操法甚熟廣饒九南道瑞澂充統轄官經理各路礮務查該臺山勢陡直經雨難登骨牌洲突出江心若水漲時敵艦繞依北岸駛過此處礮小力恐不及且有一礮設於峭壁之下頗不合宜兼之護礮各房建於明地尤易致敵連擊第二路湖口礮臺在縣城北門外石鐘山側地當鄱陽湖口門窺岸武曲江西岸梅花洲分設二臺可收夾擊之效置前後礮位共十尊正副臺官各一員管旗號手共五名礮日勇七十一名查西

臺建於梅花洲上水漲恐致淹浸難稱得勢兩臺礮位半屬舊式動轉欠靈礮屋過老經礮震動易致傾圮惟目勇步操尙純熟可觀第三路金雞坡礮臺在九江府城東十里臺踞南岸高阜地勢宏敞基尙堅固東西北三臺置前後膛礮位十二尊總臺兼正臺官都司銜升用守備黃仲則副臺官一員軍械糧餉教習共六員管旗號手機匠德律風共六名礮目勇三十二名護臺礮目一百五十四名查該臺礮位機件間有不全惟目勇操礮尙熟官弁亦尙精壯第四路岳師門礮臺在九江府東門外分上下兩臺沿岸建築與金雞坡銜接一氣分置前後膛礮位二十一尊舊式者居多正副臺官各一員管旗號手共五名礮目勇七十一名礮操手法尙熟查江西各路礮臺經該道瑞澂接督後稟請該撫力加整頓並調學堂出身者數人派充臺官教習但地勢礮位不盡合宜官兵操防雖稱熟悉惟於用礮之法尙欠講求然較之皖省實覺勝強數倍湖北省礮臺祇田家鎮一路分中南北三臺中曰吳王廟南曰半壁山北曰馮家山礮臺土鑄銅鐵礮及洋礮共三十六尊查該處地居上游本非衝要礮臺築法甚舊久已作廢除土礮業爲棄物外其後膛洋礮數尊尙屬堪用現僅有哨官一員帶領目勇五十名分駐看守一陸軍江蘇省駐紮蘇州省之撫標續備軍分中後兩營每營官弁勇夫四百零六員名初係蘇防營光緒二十八年正月改編今名又親兵一營官弁勇夫五百十八員名初係親兵小隊同治八年添募成營亦於二十八年

一併改編今名江蘇候補道松峻充全軍統領尙有左右前三營分紮黃渡澱澤宜興等處未經調操中後兩營及親兵一營除守營患病外計到操兵共五百六十八名所用鎗枝新舊毛瑟多半應佩荷包水雷彈袋鐵鎗等項均未購備練習德操不及程度兵丁年老及有嗜好者居其大半裝束雖係短衣草帽而各營不一且多襤褸一切身法鎗法步法轉法種種不合不堪枚舉統領松峻因病未到蓋營哨各官半係出身營伍於武備以未講求毫無肅肅氣象又駐紮蘇州省城內外之巡警軍分左右兩營每營官弁勇夫三百三十三員名初係練軍二十八年正月改編今名除守營患病外計到操兵三百八十餘名所有鎗枝及一切操法與續備軍略同而廢弛過之查該軍係由制兵改練官長係綠營人員兼充只幾巡警之名毫無實際江南省駐紮吳淞礮臺後路之南洋續備盛軍分中前左右後五營每營官弁勇夫五百十員名初名慶軍後改淞防營二十六年二月改稱今名升用副將徐州鎮標中營游擊戴鶴松充全軍統領除守營患病外計到操兵一千六百七十名步兵用毛瑟鎗一切應佩零件未備練習德操身法鎗法步法轉法及軍容軍服雖不盡合度然較之蘇營頗稱壯觀中營所操兩磅子車礮擦拭尙屬光潔間有解拆卸各法者惟於瞄準及用礮之理官長多未講求各營出演行陣攻守皆不得法亦不能擇占地勢官兵打靶命中者甚少查該軍兵丁強壯饒有武力惟平時操練專恃教習指授營哨各官半係

勇營出身不解新操此各軍通病不止一處爲然統領戴鶴松人尙精神於新學亦少有體會又駐紮江陰敵臺後路之南洋續備老湘合字軍分中前左右後五營每營官弁勇夫四百九十七員名初名老湘合字營二十六年改稱今名提督銜江南海門營副將丁華容充全軍統領除守營患病外計到操兵一千四百名用老毛瑟鎗應佩刺刀背包等項未備練習德操身法鎗法步法轉法均不合度化排行列不勻軍服尙係一律腦準時大半不識表尺受令後間有交頭接耳者陣式泥於方城等舊法不諳散隊惟舞鎗體操尙屬整齊另有兩磅子車礮每營分出四棚演練搦拭雖不光潔拆卸尙屬靈便查兵丁老壯參半官長僅能隨行操演并不能發口令教習口令復多錯亂且有染嗜好者亦非學堂出身宜乎士氣不能振作統領丁華容軀幹英挺曾經出洋多次粗解兵學亦能乘輪發令惟其次官長教習均不得力以致難有起色又駐紮江陰敵臺後路之南洋續備南字中左右三營每營官弁兵勇五百十員名原係十一營二十一年裁撤八營二十六年改稱今名兩江補用副將陳東賜充各營統領右營之中左右三哨分防常州未經調操其左右兩營及右營前後兩哨計到操兵七百二十名軍容軍服軍器軍紀及一切操法與合字營略同而官長舊習尤重教習口令較好統領陳東賜人尙精神惟於新操全不諳悉又駐紮鎮江敵臺後路之南洋續備新湘五旗官弁勇夫二百八十九員名初名新湘二十六年改稱今名

頭品頂戴兩江補用參將徐萬福充各旗統領左旗因雨未經校閱當在東生洲看視後旗操法除守營
患病外計到操官兵一百八十七員名用老毛瑟鎗剩殘壞衣靴亦不整齊官無佩刀兵無皮帶以布
束於腰際子彈盛以布袋挂於項上種種情形不堪入目兵丁體質強壯者尙不及半操法亦太生疏復
於鎮江看視中前右三旗到操兵四百五十名軍容操法廢弛情形一如後旗統領徐萬福委靡不振於
操法茫然不知且不常川駐營殊不稱職前署兩江總督端方業將該員撤差另委參將李雲松接統又
駐紮鎮江府城左近之南洋武威新軍分中前左右後步隊五營副中礮隊一營每營官兵五百十
二員名三十年正月招募成軍總兵銜留江補用副將魏榮斌充全軍統領除守營患病外計到操兵一
千八百九十六名步隊用比國快鎗化排時統領魏榮斌乘騎前行不知操法兵丁行步舉鎗不合操章
以致散亂無序其步法轉法礮跳裝放刺鎗體操各式略具形似瞄準時兵多不識表尺且有銹滯不能
起落者礮隊所用兩磅子過山礮三磅子快礮目兵不盡能拆卸亦不知零件名目查該軍成營未久半
係新兵體質尙均壯健官長亦尙精神惟能發口令者尙少全恃教習教練統領魏榮斌身弱多病嗜好
甚深聞平日不到操場且有空煩情事營務廢弛不爲衆將推服前署兩江總督端方已將該員撤差另
委參將龔炳魁接統又駐紮鎮江府城外之京口駐防常備軍一營計官兵五百零八員名右翼協領蔭

濃充管帶歸京口副都統節制二十六年十二月成營除守營患病外計到操兵四百八十二名用老毛瑟鎗應佩零件未備習練德操軍裝係號衣纓帽不甚整齊兵丁體質尙壯操法生疏幾致不成行列軍容軍律更無論矣以什長一人發口令隨有外約教習一名默不作聲儼同虛設雖係武備出身然考教法甚屬平常查該營編練將近四年官長均拔自旗屬不能新操所調教習又復有名無實宜其廢弛一至於此當卽商之副都統奇克仲布嗣後務擇上等教習厚其薪資將官長中之合格者加之操練其不合格者撤去另補必官盡知操然後始能教兵庶幾口有起色復查該軍正兵內有在該副都統署中充當差站者殊屬違章已令全數歸營不得役使止兵又京口駐防續備軍一營制與常備軍同以左翼協領廷浩充管帶二十八年三月成營衣帽器械軍容操法一如常備軍而廢弛尤甚此外尙有巡警一營因係彈壓地方未經調閱又駐紮儀徵縣境之南洋續備奇兵左旗尙有右旗駐紮上海縣一帶兼護製造局未經調閱左旗官弁勇夫三百二十五員名光緒十年成營近改南洋續備軍除分防及守營患病外計到操兵六十餘名用老毛瑟鎗應佩零件未備習練洋操軍容軍裝均欠整齊舞鎗體操毫無勇氣蓋由官長夙不講求操法故舉無足觀又駐紮金陵省城之南洋常備右軍分一二三四右後步隊六營礮馬工程各一營步隊一二三四四營每營官弁兵夫二百二十三員名右後兩營每營官弁兵夫五百

零六員名礮隊三百九十七員名馬二十二匹馬隊一百五十二員名馬一百二十五匹工程隊四百一十二員名礮馬隊三十年改練步工隊三十年七月改練兩江補用副將陳煦堯充全軍統領除守營患病外計步礮馬工共到操兵一千二百三十餘名用奧國曼利夏鎗刺刀彈盒背包水壺等項俱備步隊習日德操法官兵尙屬強壯軍服亦均整潔惟化排時兵丁轉折疾徐互有出入步伐亦過遲緩操散隊官長不知率領之法兵亦不知自尋地段遲延扯謊強曳成行左顧右盼語音嘈雜站跪臥各項擊法高下不一歸隊時有托鎗者有夾鎗者皆於軍律不合礮隊用兩磅子哈乞開斯礮一磅子快礮大小不一馬亦雜色隨礮子藥車祇有數輛且不齊全官兵體質尙好惟皆不諳表尺亦不知礮件數目及拆卸各法管帶葉天厓年老而庸發令臨準高低未能合度礮馬亦驚跳不安其爲新備無疑馬隊兵尙強壯化排不成行列且亦不知陣式環繞多次遂作中止步走時哨長有落後者馬毛色夾雜疲瘦者多工程隊站立一隅據云不能步操是蓋誤認工程之名以爲專事工作而不知尙有他事且溝壑橋梁等學亦多不講求該軍於省城東門外演試行軍多未合法其右後兩營操法尙不及此查該軍雖係新營然皆舊兵改編故習仍存統領陳煦堯年力精壯器宇尙好於新操雖不甚明晰尙肯用心已屬其加意教練俾期改觀又駐紮金陵下關雨花臺等處之南洋續備護軍分左右前後四旗每旗官弁勇夫二百九十員

名二十六年閏八月成軍提督銜總兵羅吉亮充全軍統領除守營患病外計到操兵六百零八名習日本操用比國快鎗佩有刺刀皮盒等件官兵老弱者居半其年壯者亦不諳操法所設教習皆係自強軍目勇並無學堂出身者官軍教習任意粉飾與他軍歧異操法欹斜錯落殊欠整齊腦準不識表尺者甚多前旗管帶李清貴素不知操調練時擅離隊伍赴演武廳後坐恩聞調倉皇而至左手舉刀右探刀鞘不知所持管帶爲一營表率愚謬至此難期得力當飭將該管帶開差示儆統領羅吉亮平日既廢弛營務臨操又託病不到前署兩江總督端方業將該統領撤差另委營務處候補道朱恩職接統又駐紮金陵下關之江南武威新軍分左右翼兩旗官弁勇夫二百八十九員名總辦武備學堂候補道陶森甲兼充統領除守營患病外計到操兵四百十名用毛瑟鎗隨有刺刀彈盒等件習日本操各兵皆皖北人著灰色軍衣所操大隊進退轉折尙屬熟悉散隊臥壘多未如式頭目領排不持軍器官弁領隊尙爲得法兵丁亦能拆卸鎗件惟操時未久輒至喘息蓋係力竭之故又駐紮旗營之江甯駐防常備續備各一營每營官兵五百零八員名常備係二十六年正月成營續備係二十九年二月由常備精銳營改歸江甯將軍節制除守營患病外計到操兵各三百六十名用格於斯密式鎗隨有刺刀彈盒每營中有礮隊一哨用一磅子輕快礮兩磅子克鹿卜礮均習德操衣帽與京口兵同軍衣多未扣紐不合身者甚多操靴

新制式樣不一軍械半屬銹澀官長佩刀各異多係自備另有差委數人皆手持馬鎗入伍隨行兵丁強弱參半官長不諳操法教習亦皆無學問步操化排時前後相距祇三四步其餘身法鎗法步法轉法多不如式瞞準不諳表尺且有起落不靈者操礮時哨官驟令放礮不先瞞準於理未合體操亦不及程度查該兩營兵丁加以淘汰尙屬可用惟官長於兵事太欠講求故無起色已由江甯將軍永隆等將年老官長更換數員並由前署總督端方酌撥新式鎗礮俾期認真操練安徽省駐紮省城之常備軍分前後左右四營每營官弁勇夫五百零五員自三十年三月成軍按察使濮子潼充全軍統領除守營患病外計到操兵一千五百六十五名用老毛瑟來復鎗兩種操法兼採德日所長軍服長短不一鎗枝銹澀者甚多背包水壺等件未備化排不成正角前後距離或遠或近操法多未如式操散隊時官長不向前率領衝鋒時走便步皆不合戰理惟兵勇強壯者居其大半惜官長不盡知操教習又未能得人統領臬司濮子潼經理雖極認真究以實任臬司兼辦此事似有未宜又駐紮省城及攔江礮前江口各礮臺之安徽續備軍步隊中前左右四營每營官弁勇夫二百八十六員名馬隊一營官弁勇夫一百二十八員名戰馬一百十四匹三十年四月成軍總兵費金組充全軍統領用老毛瑟鎗應佩零件未備習德國操步兵老弱者居多軍服既不整齊軍械復多銹澀馬隊號衣戰裙均極殘舊人老馬疲廢弛殊甚統領費金

組身弱多病聞自奉委後久未到營一切操法均未諳悉雖勝統領之任又駐紮省城北門外之武備學堂練軍分左右兩隊官弁兵夫三百七十四員名武備學堂提調丁憂安徽特用知縣譚學衡兼充統帶管帶哨官等均係學堂教習學生兼充三十年二月成軍兵士皆選身材合格年少識字者充當且多官紳子弟長江水師提督程文炳之子亦在其中用鄂造小口徑毛瑟鎗佩有刺刀彈盒等件除守營患病外計到操兵二百六十一名軍服合式操靴上布下皮能履泥淖鎗枝精潔裝束鮮明軍容肅靖安詳身法操法鎗法單人小隊中隊大隊及散操礮隊秩然有序兵房亦高廠光潔便於居處每日尚有內堂功課訓練兼施亦臻精美查該軍成營未久進步甚速固由於官兵均知向學亦係統帶譚學衡認真教練勞瘁不辭故能致此又駐紮蕪湖之安徽常備武衛副中營官弁勇夫二百八十八員名又駐紮蕪湖及東西梁山礮臺之續備精健前左右三營每營官兵勇夫二百零三員名均於二十七年十二月改編成營福山鎮總兵李定明充各營統領兩江補用副將李振標充幫統所用鎗枝種類不一均係舊式習德國操軍容軍服極不壯觀兵丁老弱者居半點驗時號兵與正兵雜處散隊後倒荷鎗枝喧闐震耳軍紀異常懈弛統領官長於新操茫無閱歷教習亦近濫竽蕪湖爲通商鉅埠似此營伍不特不足以備緩急且恐爲外人訕笑江西省駐紮九江府之常備前軍分一二三四五五營每營官弁勇夫二百九十八員

名廣饒九南道瑞澂充全軍統領二十九年十二月三十年二月先後成營第二營因派赴樂平縣剿匪
暫令駐紮其餘四營除守營患病外計到操兵六百二十四名操法兼採德日所長用五響毛瑟鎗操拭
光潔隨有皮帶刺刀彈盒等件軍服一律長短合度官兵精壯動作有禮所操小隊中隊大隊散隊身法
步法鎗法變排陣準雖未盡合法度然皆勇往精神舞鎗體操亦稱熟悉查該軍成營甫逾半年統領瑞
澂督催訓練尙能認真官長多係學堂出身亦能相助爲理湖南省駐紮省城南門外之常備湘威中左
右三旗每旗官弁勇夫三百五十九員名三十年八月十月先後成營提督顏瑗林充全旗統領左旗係
新兵未經列操中右兩旗除守營患病外計到操兵五百二十八名用老毛瑟鎗隨有刺刀惟彈子盛以
綫帶斜挂胸背仍是舊態軍服尙一律兵勇有赤足者有著草鞋者官長衣袖長或過膝操法兼採德日
所長一切均未如式查該軍甫經成營兵丁尙皆強壯惟官長不盡知操教亦未易見效統領顏瑗林身
體尙健略知操防教練未能得法又駐紮省城各門之常備軍銳字第一二三三旗每旗官弁勇夫三百
五十八員名三十年十月成軍補用總兵謝典禮充全軍統領除守營患病外計到操兵八百六十四名
所用鎗枝九響毛瑟單響毛瑟前膛來復不等兼習德日兩國操法一切與湘威旗略同頭目均係執旗
手無軍器腰不束帶於理未合查統領謝典禮強壯樸實毫無習氣官長目兵亦多勇力惟於新操大欠

講求雖係成營未久若如此教練恐以後難望精進又駐紮省城之常備軍定字第三旗官弁勇夫三百五十五員名二十八年十一月成軍補用都司楊通福充督帶官第一旗調赴廣西第二旗駐紮對岸營盤嶺未經調閱第三旗到操兵二百四十名用老毛瑟鎗佩件不全其軍容軍服與湘威及銳字等旗相似督帶楊通福身體強壯惟專事奔走操防茫然不稱督帶之職又駐紮省城南門外之續備軍武字第一旗官弁勇夫三百五十五員名三十年十月成軍已革副將徐恆山充督帶官尙有三四五等旗駐紮常衡兩屬未經調閱第一旗到操兵一百九十四名用小口徑毛瑟鎗隨有刺刀觀其外表似與他軍相等惟官長尙屬精壯湖北省駐紮省城之常備軍分第一第二兩鎮每鎮馬步兵兩協每協分一二三三旗每旗分甲乙丙丁四營又每鎮附屬兵甲乙丙三營騎兵甲乙兩營工程輜重各一營現在兩鎮僅有左協其右協均未招募騎兵僅募一營兩鎮官弁兵匠現共一萬一千四百八十九員名馬二千一百八十八匹此係減練辦法各營兵丁有係三十年八月由左右翼改編者有係十月新募成軍者總兵張彪充第一鎮鎮統兼左協協統游擊黎元洪充第二鎮左協協統兼護鎮統除守營患病外計到操官兵一萬零五百十八員名所用鎗砲多係漢廠製造馬鎗間有用德購者佩帶零件如荷包食袋水壺飲鐵雨衣裹襪皮靴等項應有盡有操法兼採德日所長步兵單人小隊中隊大隊散隊身法隊法鎗法手法

一切如式間有小疵不足爲累礮兵所操各礮極爲光潔上下礮機亦稱捷速且各能自識職守惟礮準未能一律合度騎兵操縱轉折奪隘衝鋒及擊刺各法秩然有序馬匹亦壯惟嫌白色稍多工程兵於應盡責成頗知講求步操甚整惟輜重隊器具尙未全備各營體操亦孔武有力兵房高敞潔淨經用各物均有一定位置有條不紊查該軍兵丁新陳相間編練未久軍容煇耀已壯觀瞻洵可爲沿江各營伍之冠詳加簡閱操法雖未能絲絲入扣然官長均係出洋或武備畢業學生兵丁識字者甚多將來可望漸成勁旅惟所操行軍布置未盡周密攻守亦欠講求再該軍官兵滿漢並用內有官二十餘員兵八百餘名皆係荊州駐防其餘兵工廠及護鐵路各軍隊亦皆一律精壯河南省駐紮省城之常備軍分左右兩翼左翼步隊中左右三營隨礮隊一營右翼步隊中左右三營隨馬隊一營共礮馬步隊八營全軍官弁兵夫四千六百七十員名馬二百六十一匹右翼步隊三營係二十九年閏五月成營左翼步隊三營係三十年二月成營礮馬隊均於三十年九月成營江蘇補用道袁世廉充全軍翼長補用副將王佩蘭充左翼分統兼帶礮隊補用參將楊榮泰充右翼分統兼帶馬隊除守營患病外計到操兵二千一百四十三名步隊用十鎗毛瑟鎗隨有刺刀彈盆等件礮隊用兩磅子鋼礮三生七快礮五生七快礮三種馬隊用毛瑟鎗習德日相參操法官兵強壯軍容整齊步隊操法雖不無小疵大致頗稱壯觀馬礮隊未能整

齊兵係新募現係練習步操於戰學尙未諳悉職位種類不一似有未宜馬隊毛色夾雜且係新兵操練尙欠工夫查該軍係分次招募而成尙未能一律精進翼長袁世廉分統王佩蘭楊榮泰均能實心任事勞瘁不辭當可日見起色惟所演行軍尙欠講求又分統城內八隅之巡警兵一營共官弁勇夫六百七十三員名三十年正月成營候補道吳對光總辦隨川汛把總王鋪充營帶官除巡街守營外計到操兵二百九十四名用哈乞開斯新毛瑟兩種鎗枝習德日相參操法官兵雄壯軍容一切與常備軍隊略同查巡警係爲彈壓地方而設其陸操復能勸加教練整齊可觀自堪嘉尙又駐紮省城之撫標練軍馬隊合營計步隊四哨馬隊一哨共官弁兵夫四百五十員名馬五十匹同治十二年添練中軍參將文煥充統帶官除守營患病外計到操兵二百七十八名步隊用十響毛瑟鎗馬隊用馬快鎗習德國操法官兵壯者居多惟所著操衣操帽均係洋式與他營殊欠一律操作各法亦皆如常巡警等營尙稱不弱又河南駐防兵額設城守尉一員佐領十員防禦十員驍騎校十員隨印筆帖式一員領催八十名馬甲七百二十名步甲一百名匠役二十名共官兵九百五十二員名外雲騎尉十員恩騎尉一員六品廕生一員均歸城守尉管理一切操法均係舊式所用操鎗鳥鎗火礮長式弓箭等項演習八卦等陣殊欠整齊官員習染英深兵丁老弱居半到操兵數亦多不實操法紀律尙未講求廢弛已甚該城守尉志明年老糊

途委靡不振雖在任有年難稱得力已商由撫臣陳夔龍設法整頓以期精進一水師按長江水師提督所轄四鎮曰江甯之瓜州鎮江西之湖口鎮湖北之漢陽鎮湖南之岳州鎮提督駐紮安徽太平府居中調度管轄五省江面上下五千餘里每鎮總兵一員提鎮五員副將五員參將七員游擊十員五標營都司共四十四員守備四十三員千總一百五十八員把總一百九十五弁外委二百六十八弁共七百三十五弁員額設舵兵七百十八名頭兵七百十八名艙兵四十四名礮兵一千五百二十四名營兵六千零四十八名親兵二百八十名稿書一百名書識六百四十七名共兵甚一萬零七十九名額設督陣舢板三十二號每號配兵十六名左右哨長龍戰船四十四號每號配兵十九名左右哨督陣舢板四十四號如遇差操巡防則由長龍船撥兵駕駛舢板戰船六百四十二號每號配兵十二名續添飛划巡船六百四十三號隨同各汛舢板以便巡江放哨之用共計舢板戰船七百六十二號飛划巡船六百四十二號除各守營汛未經調集不計外奴才行至江西查閱湖口鎮操該鎮所屬中營安慶吳城華陽四營到操戰船四十號督陣舢板一號戰船每號配兵十二名哨官一員船頭尾各置前膛老礮一尊左右置前膛老鎗一具督陣舢板配兵十六名指揮官一員旗幟號衣雖係陳式尙鮮明耀目共演八陣礮聲尙屬聯絡惟械老陣舊習氣甚深調閱操練進退分合尙能裕如但水師兵丁能赴水者不多船駛過遲風定

溜平每點鐘僅可行十餘里稍遇風浪即須停泊難稱得力此外各鎮沿途查看大致與湖口略同惟官兵精壯稍遜一武備學堂江蘇省武備學堂在盤門外半里許光緒二十七年七月由各營挑選識字勇丁四十名入堂肄業爲正課生初名隨營學堂後改武備學堂二十八年二月復選募官紳世家子弟以及文武舉貢生監四十名爲副課生分兩班教練咨調江南陸師學堂畢業生四名派充教習內堂課以戰法地勢軍械測繪算學營壘漢文等門外場教以操鎗操礮柔軟體操器械操打靶行軍諸門三年爲卒業總辦一員以候補道松峻兼充提調文案等六員一切辦法仿照江南陸師學堂章程尙有次第講堂齋舍亦尙整齊惟內堂功課程度尙淺外場步法均欠整肅教操腦準未能合度拆卸礮件亦不熟悉查該堂開辦有日課程多未及格良由教習不得其人亦由總辦提調不能勝任之故江南省將備學堂在江甯省城昭忠祠內借地開辦另建新堂在小營地方尙未落成二十九年十二月開堂學生由各營旗挑選官兵送入仍食原餉正額二百四十名附課十名以一年爲卒業日本總副教習各一員各取華教習十一員總辦一員候補道陶森甲會辦一員補用道席殿驊提調文案等共七員查該堂開辦未久內堂外場功課程度頗淺其各營旗送入官兵在三十五歲以上而羸弱幾居其半年少各生尙皆英銳各教習均能勸懲將事日久當有起色惜堂規稍鬆均存見好之習於學生去取辦理未能認真陸師

學堂在儀鳳門內三牌樓和會街二十二年十月開辦分陸師普通待衛爲三堂陸師學生八十名普通學生一百名待衛二十一名洋教習二員各項華教習十三員總辦一員候補道羅長綸監督提調監院緝譯共十七員內堂課以兵法繪圖輿地地勢軍器歷史營壘算學測量工程人倫道德漢文英文德文東文等門分年教授外場教以步操打靶礮操體操馬操等門以三年爲卒業陸師學生分甲乙兩班甲班德教習特屯和恩授課訓其戰法陣法對答未能詳明乙班德教習漢斯瑞授課所習軍械學各生於聽講後不復默錄一過恐記憶難真普通學生造詣尙淺算法止學至平方餘亦平平步操礮操大致可觀惟祇以處尙多查該堂創立已久一切規模足稱完備但所習課程未能精密以致卒業各生派至各軍多未得力緣歷任總辦均於此道未嘗學問故致如此水師學堂在儀鳳門內光緒十六年九月開辦分駕駛管輪兩門每門學生四十名洋教習一員駕駛管輪升桅漢文體操洋文各教習共十一員總辦一員候補道張錦勳提調文案等共六員內堂課以洋文天文輿地海圖漢文算學水力及製造汽鍋汽機各法附有魚雷一營光緒十八年閏六月開辦員司書吏十二員名雷艇四艘泊於下關草鞋峽江面每艘官弁四員舵工管油升火雷兵水手夫役各二十五名歸該堂總辦兼理平日演練魚雷用法水師學生分頭二三三班以六年爲卒業除肄習內堂功課外並擬派附兵輪巡歷各洋海口爲練習風沙水

綫之用查該堂立法甚善規模已極宏敞學生敏捷英武書居多惟教法太舊堂規鬆懈以致學生入學數年尚未登舟演習且查堂內小機器廠屋內塵垢積滿不似逐日操作氣象所存新磚魚雷多碰傷者辦理殊欠認真安徽省武備學堂在安慶府省城北門外光緒二十五年四月開辦額設學生八十名新增二十名洋教習二員華教習六員提調兼練軍統領丁憂安徽試用知縣譚學衡委員五員內堂課以養兵秘訣步兵操典鎗之保存法體操教範數學世界地理及衛生測繪戰術營壘兵旗等門外場教以步操鎗操柔軟體操器械體操行軍打靶劍術等門均分年教授以三年為卒業查該學生年少領美習氣毫無且動作嫻雅彬彬有禮布列兵旗所擬方略攻守各見心思外場各項操法亦皆精美該堂提調譚學衡辦理得法其大隊操法即係自發口令進退分合秩然有序且勤懇耐勞素為學堂敬服惜堂基係書院改建局勢未宏人數無多款項不裕自應設法擴充湖南武備學堂在長沙府省城小吳門外光緒二十九年四月開辦學生定額一百名由本省俊秀內選取附以目兵學營二十九年九月開辦學生定額一百五十名由本省各營內選拔武備教習職員二十名目兵隊長教習九名除放年假及有事故不計外兩項共到堂學生目兵一百零八名補用道俞明頤充該堂總辦內堂課以武備普通各門因建設未久程度尚未深造外場操法軍裝整備士有武氣查該堂自總辦以下員司無多事權既專經費亦

省若再能於內堂功課認真請求必有進益湖北省武備普通中學堂在武昌府省城內關馬廟前光緒二十九年十月開辦學生定額二百五十名分三年報齊二十九年十月三十年八月已招一百七十二名分一二三班各項教員十四員候補知府黃以霖充該堂監督教授部課漢文外國語歷史輿地數學博物格致圖畫各門卽係內堂功課訓育部課術科學科兩門卽外場功課每門各有子目分年遞進四年畢業升入高等學堂由淺入深誠得造就人才之法中國歷史自上古起已學至晉初中國輿地已學湖北湖南安徽江西廣西福建六省算法已學代數幾何第一卷教員考問時各生對答間有不合者館操體操均有雄氣統累處亦所不免查該學堂創立未久一切課程未能遽臻純粹惟教員半係日本畢業學生講解尙能明晰至於講堂齋舍光潔雄偉頗具振興氣象武備高等學堂在省城內黃土壩二十二年十一月開辦原名武備學堂二十九年奏改今名學中班长八名舊班學生十四名係本堂原有之生新班學生三十三名速成班學生四十名係本年九月由將弁學堂撥入德教習二員日本教習二員軍醫一員華教習十一員譯書管理共十三員布政使李岷琛爲總辦候補知府黃以霖爲監督各班學生不及高等程度現補學普通係課以修身漢文外國語歷史輿地數學理化圖畫諸門軍事學課以戰術軍制兵器築城地形馬學衛生外國語摘講諸門每門各有子目三班學生課程略有不同以二年半

爲卒業內堂試以測繪代數典令理化諸學各生所習普通未久間有理解未清者外場試以步操礮操體操亦未盡熟悉查鄂省武備學生自創設以來歷次卒業各生派入軍隊者頗多得力之人卽遣赴東洋各生大率亦由此中選派是該堂實爲武才淵藪近以改名高等齋班畢業後堪充是選者一時誠難其人故以將弁撥入連齋班之不及格者一律改習普通惟各生甫經入門加以年齒稍長程效較遲故所習難云粹美綜計所閱各處礮臺則江南較勝江西次之安徽又次之陸軍則湖北之常備軍爲最優河南之常備軍步隊大營江南之常備軍步隊四營江西之常備前軍步隊四營粗有可觀蘇州安徽之續備各軍江南之護軍四旗新湘五旗廢弛最甚其餘各營操法亦多平常水師則湖口差強餘均較遜武備學堂之規模宏富條理精詳成材多而功用著者當以湖北爲最安徽則經理有法故員生較無習氣第局面尙欠擴充江南則興辦有年故氣象頗具大觀而教法難言盡善湖南則程度尙淺蘇州則規畫未宜河南省經開辦尙無優劣之可言至各省礮臺軍械則或新或舊頗覺參差而一切營制餉章軍服操法微特此省與彼省不同此軍與彼軍不同甚至同省同軍而此營與彼營又不同殊欠整齊畫一至於缺額之弊不肖將領平日難保其必無此次因有查閱之舉早已預備補齊故抽查時尙無空額然其間有操法生疎者其爲臨時新募無疑又綠營兵丁久成虛設現雖間已改爲巡警藉以彈壓地方然

亦不甚得力奴才每於闕閤所至首以 朝廷銳意圖強重視武備之意剴切宣布其優者當面予褒嘉其劣者則遂加指摘造就堪資者勉以尊親大義見聞較陋者令其講習新操並告以前經練兵處奏定章程隨時請 派大員輪赴各省認真校閱務皆努力上進精益求精以備國家干城之選該官兵學生等靡不歡欣鼓舞奮勵有加其駐紮較遠未經調閱各軍當商之各省督撫臣轉飭悉心整理以期兵歸實用餉不虛糜漸收奮武闡強之效 上諭鐵良奏遵旨抽閱江蘇等省營伍情形一摺據稱陸軍以湖北之常備軍爲最優河南之常備軍步隊六營江南之常備軍步隊四營江西之常備軍步隊四營粗有可觀蘇州安徽之續備各軍江南之護軍四旗新湘五旗廢弛最甚其餘各營操法亦多平常水師則湖口差強餘均較遜等語各省營伍迭經嚴諭該督撫等認真整飭勸加訓練不當三令五申乃除湖北陸軍外其餘各省積習迄未力除實屬有負委任湖廣總督張之洞夙抱公忠所練陸軍獨能出色深堪嘉獎至蘇州安徽之續備各軍江南之護軍四旗新湘五旗如此廢弛殊堪痛恨所有各營統領江蘇候補道松峻候補總兵費金組羅吉亮補用參將徐萬福著一併革職費金組一員情節尤重著革職永不敘用並不准投効各營其餘幫統以下各員著該督撫查明嚴參又安徽各營統領福山鎮總兵李定明茫無閱歷軍紀異常懈弛李定明著卽行革職統領南洋武威新軍留江補用副將魏榮斌不知操法嗜好

甚深平日不到操場且有空額情事魏榮斌著卽行革職並將空缺兵餉履行提追該督撫等均著履行
申飭嗣後各該督撫務當振刷精神將水路各軍及武備學堂切實經理按照練兵處奏定章程悉心教
練以期養成勁旅餉不虛糜經此次嚴飭之後倘再仍前玩泄罔知振作惟各該督撫是問懷之○甲午
閩浙總督魏光燾陝西巡撫夏時緣事解任○以升允爲閩浙總督曹鴻勳爲陝西巡撫○諭軍機大臣
等商部奏江甯等府當商額外恩捐懇請減免一摺著周馥體察情形奏明辦理原摺著鈔給閱看將此
諭令知之○乙未以龍鴻書爲湖南布政使英瑞爲湖南按察使○以特圖慎爲左都御史○以溥頤爲
察哈爾都統○諭前據理藩院奏敷漢郡王勒恩扎勒諾爾贊被護衛幅株哩砍傷身死一案已有旨交
刑部嚴行審訊茲據翁斌孫奏請特派王大臣會同查辦等語此案情節甚重仍著刑部悉心研鞫嚴切
根究務得實情從重懲辦毋稍輕縱○鳳全奏襄塘地方土司積弱日以陵削番民爲事十室九空僧多
民少大寺喇嘛多者四五百人藉以壓制土司刻削番民積習多年駐防營汛單薄文武相顧莫敢誰何
搶劫頻仍半以喇嘛爲逋逃竄致往來商旅競向喇嘛寺納賄保險卽弋獲夾喇嘛復受賄縱逸上年聚
衆撤站經前督臣飭派鍾麟同知劉廷恕帶兵剿辦將爲首滋事之堪布殲除其勢稍斂奴才道出該臺
嚴飭該土司堪布奉公守法清查夾喇嘛獲重懲復飭駐防守備張世彥由土司選募土勇百名訓練協

防近尙有法司鐸彌德元被劫之案幸未傷人該處黃土岡乾海子一帶爲夾場出沒之區當嚴檄鎮襄文武及該土司勒限嚴緝並飭派弁勇由巴塘文武懸賞購緝協拿期於獲盜究出喇嘛寺勾通情罪一併重懲以靖地方惟是據絕根株非使喇嘛寺有所限制不可卽此不圖相率效尤恐以後辦事亦多掣肘擬請申明舊制凡土司地方大寺喇嘛不得逾三百名以二十年爲期暫停剃度嗣後限以披單定額不准私度一僧其年在十三歲以內喇嘛飭家屬領回還俗奴才一面嚴諭土司堪布將大寺喇嘛令其各歸部落另建小寺散住梵修以分其勢請一併飭下理藩院核議施行如此辦法二十年後喇嘛日少百姓日增何至比戶流離緇徒坐食有土有人之效可立覩也得 旨該衙門議奏○內中調繼祿爲吏部左侍郎壽耆爲吏部右侍郎○以明啟爲理藩院左侍郎○丁酉以台布爲左副都御史○岑春煊奏廣西大致肅清請回駐廣東辦理要政允之○練兵處兵部奏 旨前以各省武備學堂尙無畫一章程難收實效籌擬陸軍學堂辦法二十條於上年八月初三日會奏奉 旨依議欽此仰見 聖朝經武培才之至意欽服莫名 等查東西各國人無不學士亦知兵吾國文武分途相沿已久非專設陸軍各學層累遞升不足以樹風聲而儲武材況時艱孔亟外侮迭乘蓄艾三年刻不容緩陸軍小學堂所以備升中學以上之資亦卽爲講求陸軍之本宜嚴定規模以端其始優予獎勵以示之榮庶幾風氣一開士氣

漸奮本原既正人才日多而一切章制則以陸軍制律別之臣等詳細講求參酌各國學制籌擬陸軍小學堂章程一冊教授規則一冊分條編纂務求規模完備紀律精嚴將以明恥教戰之心漸收有勇知方之效謹另繕清單恭呈 御覽如蒙 俞允再由臣等咨行各直省暨駐防一律舉辦並將中學堂以上

各章程分別續擬得 旨如所議行○練兵處兵部奏古者軍禮介於賓嘉鉅典鴻規炳在經史恭讀

皇朝通典 大清通禮於軍禮一類皆列專門凡治兵振旅師征受成諸容節燦然備載鴻鑠淵懿冠絕古今所以養成武德鼓舞軍人者至矣然大綱固可宏賅而常禮尙在簡略方今海國大通盟聘四至周旋壇坫軍禮爲先考其梗概各國相同章制簡明通行便利不獨關乎戎政抑且資以外交故往往有此國之將能率彼國之帥或數國之兵共奉一將之令禮無或異斯情易相聯而吾國則制度迥別風氣自爲辨節繁文動貽非笑不特與外人交際無因應之規卽於本國敬上事長亦多未嫻之義非參仿各國通行軍禮另行簡易禮節不足以資循守便交通臣等公同商酌除 朝覲公謁跪拜禮節悉遵 會典儀制外另訂行營禮節分爲官兵見官兵相遇軍隊相遇軍隊操演盤注目立正舉手舉刀舉鎗各禮節專爲陸軍官兵中外交通而設凡著軍衣者悉照遵行禮簡則易曉法立則易循無折腰致敬之繁守介冑不拜之讓情節交孚猜嫌悉泯庶幾士卒忠愛之惻油然而生軍營卑陋之習不除而自去謹繕具

清單恭呈 御覽如蒙 俞允卽由臣等通咨各省陸軍一體遵行得 旨如所議行○戊戌以錫桐爲
陝西按察使○癸卯諭軍機大臣等有人奏參安徽試用通判署壽州下塘同知宋和貴酷各款請飭查
辦等語著周馥按照所參各節確切查明據實具奏毋稍徇囑原片著鈔給閱看將此諭令知之